

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI SELASA : 15 OKTOBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 15.10.2019 (SELASA)

NO. SOALAN : 1

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan status dan kesediaan Kerajaan untuk melaksanakan inisiatif subsidi petrol bersasar dan berapakah kos yang digunakan secara purata dalam seminggu untuk mengekalkan harga RON95 pada RM2.08 seliter.

**PEMBERITAHUAN PERTANYAAN LISAN SERENTAK DEWAN
RAKYAT**

PERTANYAAN : LISAN

**DARIPADA : DATO' SERI MAHDZIR BIN KHALID
[PADANG TERAP]**

TARIKH : 6.11.2019 (RABU)

NO. SOALAN : 12

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah halangan yang dihadapi oleh pihak Kementerian sehingga gagal untuk melengkapkan data kumpulan sasaran bagi melaksanakan mekanisma skim subsidi petrol bersasar walaupun sudah setahun mentadbir.

PERTANYAAN : LISAN

DARIPADA : TUAN KHAIRY JAMALUDDIN [REMBAU]

TARIKH : 6.11.2019 (RABU)

NO. SOALAN : 54

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah kesukaran yang dihadapi oleh pihak Kementerian bagi melaksanakan sistem subsidi petrol bersasar yang masih tertangguh dan bilakah jangkan sistem ini dapat dilaksanakan mengikut perancangan seperti dinyatakan di dalam Belanjawan 2019.

PERTANYAAN : LISAN

**DARIPADA : DATO' SRI IKMAL HISHAM BIN ABDUL AZIZ
[TANAH MERAH]**

TARIKH : 12.11.2019 (SELASA)

NO. SOALAN : 13

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perkembangan pelaksanaan Subsidi Bersasar.

PERTANYAAN : LISAN

**DARIPADA : TUAN WONG KAH WOH
[IPOH TIMUR]**

TARIKH : 21.11.2019 (SELASA)

NO. SOALAN : 46

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan maklumat terperinci terhadap pelaksanaan subsidi petrol bersasar yang telah dibincangkan sekian lama. Sama ada Kementerian berhasrat untuk melanjutkan subsidi petrol bersasar ini kepada kumpulan M40.

PERTANYAAN : LISAN

**DARIPADA : TUAN NOOR AMIN BIN AHMAD
[KANGAR]**

TARIKH : 27.11.2019 (RABU)

NO. SOALAN : 42

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah status dan kaedah pelaksanaan skim subsidi petrol bersasar yang mahu dilaksanakan oleh Kementerian.

PERTANYAAN : LISAN

**DARIPADA : DATO' TUAN IBRAHIM BIN TUAN MAN
[KUBANG KERIAN]**

TARIKH : 3.12.2019 (SELASA)

NO. SOALAN : 31

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan faktor-faktor yang menyebabkan penangguhan pelaksanaan skim subsidi petrol bersasar.

JAWAPAN

Tuan Yang Di-Pertua,

Terlebih dahulu izinkan saya menjawab pertanyaan daripada **Yang Berhormat Bandar Kuching** bersekali dengan pertanyaan daripada **Yang Berhormat Padang Terap** dan **Yang Berhormat Rembau** pada 6 November 2019, **Yang Berhormat Tanah Merah** pada 12 November 2019, **Yang Berhormat Ipoh Timur** pada 21 November 2019, **Yang Berhormat Kangar** pada 27 November 2019 dan **Yang Berhormat Kubang Kerian** pada 3 Disember 2019 kerana kesemuanya menyentuh berkaitan Program Subsidi Petrol (PSP).

Tuan Yang Di-Pertua,

Penggubalan dasar bagi Program Subsidi Petrol (PSP) mengambil tempoh masa panjang yang merangkumi proses mengumpul dan meneliti pandangan dan pendapat dari pelbagai pihak berkepentingan seperti syarikat-syarikat minyak, pengusaha-pengusaha stesen, persatuan-persatuan pengguna, agensi kerajaan dan ahli-ahli ekonomi. Sesi keterlibatan ini membantu Kementerian merungkai isu dan masalah pemberian subsidi pukal produk petrol RON95 pada masa ini.

Apa yang jelas adalah subsidi petrol secara pukal ini membantu golongan berpendapatan rendah (B40) membeli petrol pada harga yang berpatutan tetapi ia juga menyebabkan golongan berpendapatan tinggi (T20) menikmati lebih banyak subsidi petrol kerana mereka mempunyai kemampuan perbelanjaan yang lebih tinggi. Selain daripada itu, di negeri-negeri yang bersempadan dengan negara jiran seperti Johor, Perlis, Kedah dan Kelantan didapati bahawa pemilik kenderaan dari luar turut mengisi petrol dan mereka ini juga secara langsung menikmati subsidi daripada Kerajaan. Oleh yang demikian Kerajaan perlu membetulkan keadaan ini dengan melaksanakan **pengagihan semula subsidi yang saksama** (*equitable redistribution of subsidy*). Ini adalah prinsip yang dipegang dalam Program Subsidi Petrol iaitu menyampaikan subsidi petrol kepada kumpulan yang layak.

Program Subsidi Petrol bagi kumpulan B40 akan bermula pada Januari 2020, terbahagi kepada dua komponen utama. Komponen

NO. SOALAN : 1

pertama adalah pemberian subsidi dalam bentuk wang tunai yang akan dimasukkan ke dalam akaun penerima. Kadar subsidi yang diberikan adalah sebanyak RM30 sebulan bagi pemilik kereta atau RM12 sebulan bagi pemilik motosikal, terhad kepada salah satu kadar yang lebih tinggi. Had maksimum pemilikan kenderaan bagi seorang individu ialah sebanyak dua (2) buah kereta dan dua (2) buah motosikal. Namun begitu, individu yang mempunyai lebih daripada satu kenderaan hanya layak menerima kadar subsidi untuk satu kenderaan sahaja

Komponen kedua adalah penyelarasan harga petrol secara beransur-ansur (*gradual*) antara harga jualan runcit petrol RON95 yang bersubsidi iaitu RM2.08 seliter dengan harga sebenar petrol RON95. Penyelarasan harga ini akan dilaksanakan secara beransur-ansur (*gradual*) dalam tempoh masa yang panjang. Dalam hal ini penyelarasan harga adalah semimumimum yang mungkin iaitu sebanyak satu atau dua sen seminggu.

Pemberian subsidi petrol adalah khusus untuk penerima program Bantuan Sara Hidup (BSH) di Semenanjung Malaysia sahaja, oleh itu penyelarasan harga petrol hanya akan dilaksanakan di Semenanjung Malaysia. Manakala bagi penduduk di Sabah, Sarawak dan Wilayah Persekutuan Labuan yang tidak menerima Program Subsidi Petrol, maka subsidi pukal bagi produk petrol RON95 diteruskan pada harga maksimum bagi jualan runcit petrol RON95 sebanyak RM2.08 seliter di semua stesen minyak di sana.

Tuan Yang Di-Pertua,

Program Subsidi Petrol bagi kumpulan B40 adalah menggunakan data asas daripada program Bantuan Sara Hidup (BSH) bagi mengenal pasti kumpulan berpendapatan rendah. Seterusnya Kementerian telah memadankan (*match*) data tersebut dengan data pemilikan kenderaan daripada Jabatan Pengangkutan Jalan (JPJ). Melalui **penggubalan dasar berpandukan data** (*data driven policy*) Kementerian dapat mengenal pasti 2,862,472 individu yang memenuhi syarat-syarat kelayakan Program Subsidi Petrol (PSP). Kerja-kerja mengenal pasti individu yang layak bermula dengan data asas program Bantuan Sara Hidup (BSH) iaitu:

NO. SOALAN : 1

- (a) 2.9 juta data bujang dari BSH 2018;
- (b) 3.35 juta data pemohon dan pasangan BSH 2019; dan
- (c) 3.4 juta data anak BSH 2019.

Manakala data asas pemilikan kenderaan daripada Jabatan Pengangkutan Jalan (JPJ) adalah seperti berikut:

- (a) 11.6 juta kereta aktif; dan
- (b) 6.8 juta motosikal aktif.

Kedua-dua data ini dipadankan bagi mengenal pasti pemilikan kenderaan setiap individu. Akhirnya ia ditapis mengikut kriteria-kriteria kelayakan Program Subsidi Petrol (PSP) iaitu:

- (a) penerima BSH beralamat di Semenanjung Malaysia;
- (b) memiliki kenderaan persendirian yang berdaftar dan mempunyai Lesen Kenderaan Motor yang masih sah;
- (c) had pemilikan kenderaan individu adalah dua buah kereta dan dua buah motosikal; dan
- (d) kenderaan yang memenuhi kriteria kenderaan PSP iaitu:
 - (i) kereta berkapasiti enjin 1,600cc dan ke bawah;
 - (ii) kereta berkapasiti enjin 1,600cc ke atas yang berumur 10 tahun dan ke atas;
 - (iii) motosikal berkapasiti enjin 150cc dan ke bawah; atau
 - (iv) motosikal berkapasiti enjin 150cc ke atas yang berumur tujuh (7) tahun dan ke atas.

Apa yang unik mengenai bagi pelaksanaan Program Subsidi Petrol (PSP) bagi kumpulan B40 ini adalah mereka **tidak perlu mengisi borang dan mengemukakan permohonan** kepada Kementerian. Bermula hari ini, 15 Oktober 2019 penerima BSH boleh terus ke portal PSP (psp.kpdnhep.gov.my) untuk menyemak kelayakan mereka. Penerima yang layak akan diminta untuk mengemas kini maklumat akaun bagi tujuan pembayaran pada bulan April 2020.

NO. SOALAN : 1

Sekiranya terdapat individu yang tahu dia memenuhi semua syarat Program Subsidi Petrol tetapi hasil semakan di portal mendapati bahawa dia tidak layak, Kementerian memberikan ruang kepada dia untuk terus membuat rayuan. Kementerian menyedari bahawa data-data seperti data JPJ yang digunakan oleh Kementerian adalah data statik (*tidak berubah*) walhal secara realiti, data JPJ akan sentiasa berubah kerana pembelian dan penjualan kenderaan berlaku setiap hari. Pendekatan bagi penggunaan data statik ini dibuat dari sudut praktikal pelaksanaan PSP. Namun saya percaya ini akan ditambah baik dengan menggunakan data-data hidup (*live data*) pada masa hadapan apabila sistem ini semakin matang.

Tuan Yang Di-Pertua,

Mengenai pertanyaan berkaitan cadangan untuk memperluaskan Program Subsidi Petrol ini kepada kumpulan M40. Ingin dimaklumkan bahawa Menteri Kewangan semasa pembentangan Belanjawan 2020 pada 11 Oktober 2019 yang lalu telah mengumumkan kategori kedua penerima Program Subsidi Petrol yang merangkumi rakyat Malaysia selain daripada penerima Bantuan Sara Hidup (BSH). Cara permohonan dan kaedah menyemak kelayakan di bawah kategori ini akan diumumkan kelak.

Tuan Yang Di-Pertua,

Mengenai kos dalam seminggu untuk mengekalkan harga petrol RON95 pada RM2.08 seliter, Kementerian Kewangan menganggarkan sebanyak RM99.76 juta diperlukan untuk mengekalkan harga jualan runcit petrol RON95 pada harga RM2.08 seliter daripada harga sebenar petrol RON95 iaitu RM2.37 untuk tempoh 12 hingga 18 Oktober 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 15 OKTOBER 2019 (SELASA)

SOALAN NO. 2

Minta **MENTERI TENAGA, SAINS, TEKNOLOGI, ALAM SEKITAR
DAN PERUBAHAN IKLIM** menyatakan :-

- (a) adakah terdapat sebarang siasatan terhadap punca utama pencemaran jerebu yang melanda Malaysia saban tahun serta apakah tindakan drastik yang telah diambil terhadap individu atau syarikat yang didapati terbabit dengan aktiviti pembakaran terbuka; dan
- (b) apakah bentuk kerjasama serantau yang telah dilaksanakan oleh negara Malaysia dengan negara-negara yang terjejas dengan pencemaran jerebu dalam usaha bagi mengatasi pencemaran jerebu ini.

JAWAPAN

Tuan Yang di-Pertua,

Untuk makluman Ahli Yang Berhormat,

(a) Berdasarkan pemantauan dan siasatan yang dijalankan oleh Jabatan Alam Sekitar (JAS), didapati punca utama jerebu di dalam negara adalah berpunca daripada aktiviti pembakaran terbuka untuk pertanian dan kebakaran hutan gambut. Bagi kes pembakaran terbuka, individu-individu dan syarikat-syarikat yang terlibat telah dikenalpasti dan sehingga kini 89 kompaun telah dikeluarkan manakala 23 kertas siasatan telah dibuka bagi kesalahan pembakaran terbuka. Di bawah Seksyen 29A, Akta Kualiti Alam Sekeliling 1974, denda sehingga RM500 ribu atau penjara sehingga 5 tahun atau kedua-duanya sekali boleh dikenakan jika didapati bersalah melakukan pembakaran terbuka. Kompaun RM2000 juga boleh diberikan bagi setiap kesalahan.

(b) Di peringkat ASEAN, Malaysia akan terus memainkan peranan untuk menggesa negara anggota terutamanya Indonesia untuk mematuhi obligasi di bawah *ASEAN Agreement On Transboundary Haze Pollution* bagi mencegah kejadian jerebu rentas sempadan. Selain itu, negara anggota perlu memberikan perhatian serius bagi merealisasikan *Road Map on ASEAN Cooperation towards Trans-boundary Haze Pollution Control with Means of Implementation* yang merupakan kerangka ke arah visi *ASEAN Haze Free Region by 2020*. Dalam pada masa yang sama, Malaysia akan menghadiri Mesyuarat *Committee and Conference of Parties to ASEAN Transboundary Haze Pollution* dan *ASEAN Ministerial on Environment (AMME)* akan bagi membincangkan isu-isu pencemaran terutamanya isu jerebu.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM (TAMPIN)

TARIKH : 15 OKTOBER 2019 (SELASA)

SOALAN

Minta **MENTERI PERTAHANAN** menyatakan sejauh manakah tahap teknologi senjata buatan Malaysia, adakah Malaysia masih bergantung pada buatan negara luar dalam membekalkan senjata, dan apakah ada usaha-usaha yang dilakukan oleh Kementerian dalam mengurangkan kebergantungan perbekalan senjata dari negara luar.

JAWAPAN

Tuan Yang Dipertua,

Kementerian Pertahanan sentiasa menyedari akan kepentingan pembangunan industri pertahanan tempatan bagi menyediakan keperluan Angkatan Tentera Malaysia (ATM) ke arah mencapai tahap pertahanan berdikari. Maka, inisiatif dan usaha telah diambil bagi menyediakan ruang dan peluang bagi syarikat tempatan membekalkan keperluan senjata ATM.

Secara umumnya, kemampuan industri persenjataan negara kini masih terhad kepada pemasangan dan penghasilan sebahagian daripada komponen senjata *rifle* yang dibekalkan kepada ATM, dengan rekaan milik syarikat persenjataan antarabangsa. Ini dilihat berpunca daripada keupayaan penyelidikan dan pembangunan (R&D) syarikat yang terhad dan masih sedang berkembang. Jumlah permintaan yang tidak mencapai *Return of Investment* (ROI) dan kegagalan syarikat tempatan untuk meyakinkan negara luar untuk membeli senjata buatan Malaysia juga menjadikan skop pasaran industri persenjataan negara kecil, sekaligus menyukarkan pihak syarikat untuk melakukan pelaburan bagi meningkatkan fasiliti dan kepakaran bagi menghasilkan senjata.

Oleh yang demikian, Kementerian Pertahanan sedang melaksanakan Program Penyelidikan & Pembangunan (R&D) secara usahasama strategik di antara Pusat Penyelidikan Sains & Teknologi Pertahanan (STRIDE), Universiti Pertahanan Awam dan ATM bagi membangunkan senjata untuk kegunaan ATM. Projek yang sedang berjalan adalah penghasilan senjata *sniper rifle* 12.7mm dan akan disusuli dengan projek pembangunan senjata mortar 120mm. Prototaip daripada projek R&D ini akan diberikan kepada pihak ATM dan agensi keselamatan terpilih untuk digunakan bagi penilaian kualiti dan prestasi dan akhirnya setelah menepati piawaian serta kehendak pengguna, prototaip ini akan ditawarkan kepada syarikat pertahanan terpilih bagi tujuan penghasilan dan pemasaran.

Kementerian Pertahanan akan terus berusaha untuk mencari inisiatif yang relevan bagi meningkatkan keupayaan pemain industri pertahanan negara dalam usaha mengurangkan kebergantungan kepada industri antarabangsa.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 15 OKTOBER 2019 (SELASA)

SOALAN NO. 4

Minta **MENTERI PENDIDIKAN** menyatakan strategi yang dirangka setakat ini bagi mencapai sasaran 60 ribu pemegang ijazah PhD pada 2023.

JAWAPAN

Tuan Yang di-Pertua,

Kementerian Pendidikan Malaysia (KPM) pada masa ini menguruskan program tajaan biasiswa bagi pengajian peringkat PhD kepada orang awam melalui program MyBrainSc dan MyBrain15 serta kepada pegawai sedang berkhidmat melalui Program Skim Latihan Akademik Bumiputera (SLAB), Skim Latihan Akademik IPTA (SLAI) dan Hadiah Latihan Persekutuan (HLP). Semua program tersebut merupakan penyumbang kepada sasaran melahirkan 60,000 orang pemegang Ph.D daripada kalangan rakyat Malaysia menjelang tahun 2023 sebagaimana yang digariskan di dalam Pelan Strategik Pendidikan Tinggi Negara.

Selain itu, Kementerian masih meneruskan pemberian geran penyelidikan (*Fundamental Research Grant Scheme*) kepada Universiti Awam (UA) yang dilihat mampu melahirkan lebih ramai pemegang Ph.D dalam kalangan warganegara Malaysia secara bersasar yang berkualiti dan dapat memenuhi ekspektasi *Graduate on Time* (GoT). Ini kerana, melalui aktiviti penyelidikan, pelajar Ph.D akan diselia dengan ketat oleh pihak UA di samping melibatkan diri dalam penghasilan penemuan-penemuan baru daripada aktiviti penyelidikan di UA untuk manfaat negara. Untuk tahun 2018, dana skim ini adalah sebanyak RM200 juta manakala untuk tahun 2019, dana yang diperuntukkan adalah sebanyak RM275.35 juta.

Aspirasi pencapaian pemegang PhD sebanyak 60,000 rakyat Malaysia menjelang tahun 2023 harus dilihat secara holistik di mana semua agensi Kerajaan termasuk pihak swasta perlu bersama-sama menjayakan hasrat tersebut. Usaha KPM hanyalah subset kepada sumbangan agensi Kerajaan lain seperti MARA dan juga Jabatan Perkhidmatan Awam (JPA) yang juga menerima peruntukan bagi program tajaan biasiswa. Selain daripada itu, syarikat swasta juga hendaklah sentiasa memberi peluang tajaan pegawai dan kakitangan untuk melanjutkan pengajian ke peringkat PhD.

Sekian, terima kasih.

RJM 18

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 15 OKTOBER 2019 (SELASA)

SOALAN NO. 5

Minta **MENTERI PERTANIAN DAN INDUSTRI ASAS TANI** menyatakan apakah bantuan yang telah diberi dan langkah-langkah yang akan diambil untuk membela nasib nelayan-nelayan di Kg. Pasir Putih, Kg. Teluk Kabong, Kg. Perigi Aceh, Kg. Tanjung Langsat, Kg. Pasir Salam dan Kong Kong Laut memandangkan air sungai telah dicemari akibat aktiviti-aktiviti pembuangan sisa toksik, air kumbahan yang tidak dirawat dan pengorekan pasir sungai tidak terkawal.

JAWAPAN

Tuan Yang di-Pertua,

1. Untuk makluman Ahli Yang Berhormat, pencemaran sungai yang disebabkan oleh aktiviti pembuangan sisa toksik, air kumbahan yang tidak dirawat dan pengorekan pasir sungai yang tidak terkawal di Kg. Pasir Putih, Kg. Teluk Kabong, Kg. Perigi Aceh, Kg. Tanjung Langsat, Kg. Pasir Salam dan Kong Kong Laut, bukan sahaja telah menjejaskan kesihatan penduduk sekitar malah menyebabkan seramai 224 orang nelayan pesisir pantai turut terkesan. Berdasarkan rekod pendaratan ikan, didapati hasil tangkapan di kawasan tersebut tidak terjejas tetapi hasil jualan nelayan telah merosot sehingga 50

peratus kerana orang ramai khuatir ikan yang dijual telah tercemar. Sebagai contoh, pada bulan Mac 2019, jualan ikan di Pasar Nelayan Pasir Gudang telah menurun daripada 60 kilogram kepada 25 kilogram sehari.

2. Usaha yang telah dijalankan untuk mengembalikan semula keyakinan pembeli bahawa ikan di kawasan tersebut tidak tercemar dan selamat untuk dimakan adalah dengan mengadakan promosi jualan ikan dan promosi masakan hasil laut di Pasar Nelayan Pasir Gudang. Kupon diskaun sebanyak RM5 bagi setiap pembelian RM20 ke atas telah diberikan kepada para pembeli. Program ini melibatkan peruntukan berjumlah RM30,000 yang telah disalurkan secara *one-off* kepada Persatuan Nelayan Kawasan Johor Selatan oleh Lembaga Kemajuan Ikan Malaysia (LKIM).

3. Hasil daripada promosi yang telah diadakan bermula dari 5 hingga 20 Mei 2019, Pasar Nelayan Pasir Gudang berjaya mengutip hasil jualan berjumlah RM43,650 pada bulan Mei 2019 berbanding RM15,550 pada bulan Mac 2019. Dengan itu, terdapat kesan atau perubahan positif hasil daripada bantuan yang telah diberikan oleh pihak Kementerian.

4. Kementerian akan memantau status sumber perikanan di kawasan tersebut dan meneruskan promosi jualan hasil tangkapan ikan di Pasar Nelayan Pasir Gudang dari semasa ke semasa bagi memastikan pendapatan nelayan di kawasan tersebut tidak terjejas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' MOHD KHAIRUDDIN B. AMAN
RAZALI (KUALA NERUS)**

TARIKH : 15 OKTOBER 2019

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI DALAM NEGERI** menyatakan sebab-sebab pembatalan dan penggantungan sesebuah pertubuhan serta menjelaskan status pertubuhan yang memperjuangkan agenda 'Malaysian Malaysia'.

JAWAPAN

Tuan Yang Di-Pertua,

Kementerian Dalam Negeri melalui Jabatan Pendaftaran Pertubuhan Malaysia (JPPM) boleh membatalkan mana-mana pertubuhan yang didaftarkan di bawah seksyen 7 Akta Pertubuhan 1966 [Akta 335]. Di dalam hal-hal seperti yang diperuntukkan di bawah seksyen 13, pembatalan dan penggantungan Akta 335 di mana:-

(i) apabila pertubuhan dibubarkan oleh pertubuhan itu dan pembubaran itu disahkan mengikut cara sebagaimana dikehendaki oleh pendaftar atau apabila pertubuhan itu dibubarkan oleh pendaftar mengikut akta ini;

(ii) atas perintah yang dibuat oleh Menteri di bawah seksyen 5 iaitu mengisytiharkan pertubuhan sebagai menyalahi undang-undang;

SOALAN NO : 6

(iii) apabila pertubuhan itu menjadi pertubuhan yang menyalahi undang-undang di bawah seksyen 14(7) kerana tidak mengemukakan maklumat bertulis; dan,

(iv) jika Pendaftar berpuas hati antaranya kepada perkara-perkara berikut:-

(a) bahawa pendaftarannya telah dilaksanakan oleh sebab tipuan ataupun kekhilafan atau salahnya taat mengenai mana-mana butir yang material;

(b) bahawa pertubuhan itu mungkin digunakan bagi maksud-maksud yang menyalahi undang-undang atau bagi maksud-maksud yang memudaratkan atau yang bertentangan dengan keamanan, kebajikan dan ketenteraman atau akhlak di dalam persekutuan;

(c) bahawa pertubuhan itu adalah berusaha hendak mencapai tujuan-tujuan lain daripada tujuan-tujuan yang ia didaftarkan;

(d) bahawa pertubuhan telah melanggar secara bersengaja mana-mana peruntukan akta ini atau, mana-mana peraturan yang dibuat di bawahnya atau mana-mana kaedahnya, atau bahawa mana-mana ahli pertubuhan telah lazim melanggar peruntukan seksyen 4(1) Akta Pertubuhan 1948 dengan apa-apa perbuatan atau penyebaran yang mana seksyen 3(1)(f) akta itu terpakai;

(e) bahawa pertubuhan itu tidak lagi wujud;

(f) bahawa pertubuhan itu telah gagal mematuhi suatu perintah yang dibuat oleh Pendaftar di bawah seksyen 13A;

(g) bahawa pertubuhan telah melanggar peruntukan seksyen 52, iaitu pertubuhan yang menggunakan upacara Triad disifatkan sebagai pertubuhan menyalahi undang-undang;

(h) bahawa pertubuhan telah tidak mematuhi notis yang diberikan olehnya di bawah seksyen kecil (1) seksyen 16.

SOALAN NO : 6

Untuk makluman Ahli Yang Berhormat juga, Pendaftar boleh mengeluarkan perintah secara bertulis bagi menggantung semua atau mana-mana kegiatan pertubuhan berdaftar yang difikirkan atau perlu berbuat demikian bagi kepentingan awam, atau kepentingan pertubuhan berdaftar itu sendiri, atau untuk menghalang pertubuhan berdaftar daripada terus melanggar, atau mencabuli mana-mana peruntukan dalam Akta 335 mana-mana peraturan yang dibuat di bawahnya, atau mana-mana aturan pertubuhan itu.

Berhubung status pertubuhan yang memperjuangkan agenda 'Malaysian Malaysia'. Untuk maklumat Ahli Yang Berhormat, keputusan dasar kerajaan, baik kerajaan terdahulu ataupun kerajaan yang sekarang tidak menyatakan bahawa agenda 'Malaysian Malaysia' itu menyalahi peraturan atau undang-undang negara. Selagi mana pertubuhan tersebut tidak melanggar mana-mana peruntukan di bawah Akta 335 dan undang-undang berdaftar pertubuhannya serta menjalankan aktiviti selaras dengan Perlembagaan Persekutuan, maka pertubuhan tersebut boleh bergerak aktif. Namun sekiranya didapati sebaliknya, Jabatan Pendaftaran Pertubuhan Malaysia boleh mengambil tindakan di bawah Akta 335 yang boleh menjurus ke arah pembatalan sesebuah pertubuhan berdaftar berkenaan. Sekian, terima kasih.

**PEMBERITAHUAN PERTANYAAN JAWAB LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 15 OKTOBER 2019 (SELASA)

SOALAN

Datuk Haji Shabudin bin Yahaya [Tasek Gelugor] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini kes masalah sosial seperti kes pembuangan bayi, kes penderaan kanak-kanak dan lain-lain kes yang kian meningkat mengikut negeri, serta apakah pihak Kementerian bercadang untuk mengkaji semula dan memperkenalkan kaedah pencegahan atau kesedaran yang lebih berkesan seiring dengan perkembangan teknologi zaman kini yang lebih dekat dengan jiwa anak muda.

JAWAPAN

Tuan Yang di-Pertua,

Statistik terkini yang direkodkan oleh Jabatan Kebajikan Masyarakat (JKM) dari Januari hingga Mac 2019 bagi bilangan kes penderaan kanak-kanak adalah sebanyak 1,623 kes dan pecahan mengikut negeri adalah seperti berikut:

Negeri	Bilangan Kes
Selangor	429
Kuala Lumpur	342
Kedah	159
Sabah	125
Perak	109
Pulau Pinang	107
Pahang	96
Johor	75
Terengganu	35
Kelantan	33
Negeri Sembilan	31
Sarawak	24
Putrajaya	10
Perlis	7

Tiga (3) buah negeri yang mempunyai bilangan kes penderaan kanak-kanak yang tinggi ialah Selangor, Kuala Lumpur dan Kedah.

SOALAN NO. 7

Manakala statistik terkini Polis DiRaja Malaysia (PDRM) bagi kes buang bayi dari Januari hingga Ogos 2019 adalah sebanyak 92 kes dan pecahan mengikut negeri adalah seperti berikut:

Negeri	Bilangan Kes
Selangor	20
Johor	15
Kuala Lumpur	13
Perak	7
Kedah	6
Sabah	5
Pahang	5
Pulau Pinang	4
Melaka	4
Kelantan	4
Terengganu	4
Sarawak	4
Negeri Sembilan	1
Perlis	0

Tiga (3) buah negeri yang mempunyai bilangan kes buang bayi yang tinggi ialah Selangor, Johor dan Kuala Lumpur.

Tuan Yang di-Pertua,

Bagi menangani isu-isu penderaan kanak-kanak dan buang bayi, Kementerian telah melaksanakan beberapa program yang seiring dengan perkembangan teknologi zaman kini bagi tujuan pencegahan serta kesedaran kepada keluarga, kanak-kanak dan orang awam.

Antara program-program yang telah dan sedang dilaksanakan bagi menangani isu penderaan kanak-kanak dan buang bayi seperti berikut:

- Inisiatif oleh Lembaga Penduduk dan Pembangunan Keluarga Negara (LPPKN) iaitu melalui **Pusat Remaja KafeTEEN** – seramai 2,061 remaja telah mendaftar sebagai ahli sahabat KafeTEEN bagi tempoh Julai hingga September 2019. Manakala jumlah lawatan ulangan remaja didapati meningkat 34% (5,061 remaja) berbanding tahun 2018 iaitu 3,356 orang. Daripada jumlah ahli sahabat

SOALAN NO. 7

KafeTEEN tersebut, seramai 524 remaja mendapat perkhidmatan kesihatan reproduktif, 226 remaja mendapat kaunseling sosial, 28,240 remaja mengikuti program pendidikan dan kemahiran dan 42 remaja yang ada hubungan seksual tanpa berkahwin telah melalui saringan kesihatan;

- LPPKN juga mengadakan **Program Pendidikan Keselamatan Keluarga (PEKA)** – kesedaran murid-murid sekolah mengenai keselamatan siber, pornografi kanak-kanak dan penyantunan seksual. Statistik bagi tahun 2017 hingga Jun 2019 seramai 400 orang jurulatih modul ini telah dilatih melibatkan pengasuh dan guru pra sekolah KEMAS dan JPNIN. Sebanyak 208 program telah dilaksanakan pada tahun 2017 hingga Jun 2019 di 6 negeri terpilih dengan anggaran 6,763 orang ibu bapa yang mendapat manfaat kesedaran dan pengetahuan tentang keselamatan anak-anak mereka;
- Jabatan Kebajikan Masyarakat (JKM) turut mempunyai **Program Sahabat Bijak “Safe and Protect”** – yang menekankan keselamatan dan perlindungan kanak-kanak telah dilaksanakan melalui kerjasama pelbagai agensi di kawasan perkarangan sekolah bagi murid sekolah rendah dan menengah, ibu bapa, guru-guru, Persatuan Iubapa dan Guru dan komuniti setempat. Dari tahun 2014 hingga Ogos 2019, sebanyak 337 buah sekolah dan 76,229 murid sekolah telah menyertai program Sahabat Bijak.

Selain itu, terdapat inisiatif-inisiatif terbaru yang sesuai dengan perkembangan teknologi zaman sekarang dan dekat dengan jiwa anak muda, iaitu:

Isu Pembuangan Bayi

- Kerjasama bersama PLUS Highways dengan memasang poster di tandas awam di 22 buah R&R seluruh negara. Kempen ini dilancarkan oleh YAB Timbalan Perdana Menteri pada 27 Jun 2019 di R&R Dengkil (Arah Selatan);
- Kempen *#savealife* yang telah dilancarkan pada 30 Ogos 2019 bertempat di Sunway Pyramid;

SOALAN NO. 7

- Kerjasama bersama TGV Cinema bagi menayangkan video pendek kempen pencegahan buang bayi dan “Kami Sedia Membantu” yang dipaparkan sebelum filem ditayangkan. Video kempen ini disediakan dengan kerjasama FINAS dan ditayangkan di 35 lokasi TGV Cinemas seluruh negara melibatkan 282 panggung wayang (kecuali filem untuk kanak-kanak);
- Kementerian juga bekerjasama dengan Google Malaysia bagi menayangkan lima (5) buah video pendidikan seksual mengenai sentuhan selamat dan sentuhan tidak selamat di *YouTube* (*Safe Touch and Bad Touch*). Statistik video di *YouTube* pada 21 Jun 2019 hingga 4 Oktober 2019 adalah sebanyak 2.79 juta *views* dan sebanyak 6.25 juta *Impression*. Manakala dari segi *view rate* adalah sebanyak 43% serta sebanyak 67,000 *clicks*, *share* dan *likes*;
- Kerjasama dengan *Big Pharmacy* dengan mempamerkan poster dan menayangkan video kempen pencegahan buang bayi di 50 buah *Big Pharmacy* di seluruh negara; dan
- Kempen pendidikan dan pencegahan buang bayi ini turut juga dipasang dan boleh diakses melalui *bus wrap advertising*, papan tanda (*billboard*) dan temu bual di radio dan televisyen.

Isu Penderaan Kanak-Kanak

- Sistem Semakan Jenayah Seksual Terhadap Kanak-Kanak dalam Daftar Kanak-Kanak. Mengikut statistik pada 1 April 2019 hingga 30 September 2019 sebanyak 134 permohonan daripada individu dan pelbagai agensi terutamanya yang berkaitan dengan penjagaan dan pendidikan kanak-kanak dengan sejumlah 2,147 orang kakitangan sedia ada dan bakal pekerja telah dibuat saringan;
- Menyediakan dan menyebarkan Senarai Semak/Panduan (Infografik) kepada ibubapa dan penjaga supaya dapat memilih pengasuh sesuai demi keselamatan penjagaan bayi atau kanak-kanak serta mengenali tanda-tanda penderaan; dan
- Kerjasama dengan pihak TNB bagi inisiatif pemberian diskaun 20% diadakan bagi tujuan meningkatkan pendaftaran, mengurangkan kos pengoperasian TASKA yang berkuat kuasa mulai 1 November 2019 hingga 31 Disember 2020 di Semenanjung membolehkan pemantauan oleh JKM bagi kebajikan dan keselamatan kanak-

SOALAN NO. 7

kanak. Manakala bagi negeri Sabah dan Sarawak perbincangan dengan syarikat tenaga akan diadakan agar diskaun ini turut dinikmati oleh pengusaha taska di dua buah negeri tersebut.

Tuan Yang di-Pertua,

Talian Kasih

Bagi memantapkan perlindungan, kesedaran dan pencegahan isu penderaan dan pembuangan bayi, Kementerian dalam melaksanakan program-program seperti mana dinyatakan juga menguar-uarkan serta memperluaskan liputan perkhidmatan Talian Kasih 15999 supaya kanak-kanak serta orang ramai dapat menggunakan perkhidmatan disediakan bagi membuat pertanyaan mengenai perkhidmatan agensi di bawah kementerian ini atau agensi lain, aduan, laporan penderaan, perkhidmatan kaunseling atau perkhidmatan sokongan sosial yang lain. Mengikut statistik pada Mei 2015 hingga 30 Jun 2019, jumlah panggilan ke Talian Kasih adalah 20,360 panggilan. Daripada jumlah tersebut, kategori kes panggilan tertinggi bagi tempoh tersebut bagi agensi di bawah KPWKM ialah kes penderaan kanak (4,606 kes), diikuti oleh keganasan rumah tangga (2,930 kes), status permohonan bantuan (1,545 kes) dan pertanyaan reproduksi manusia (1,003 kes).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI IR. DR. WEE KA SIONG
[AYER HITAM]**

TARIKH : 15 OKTOBER 2019 (SELASA)

SOALAN NO. 8

Minta **MENTERI PENDIDIKAN** menyatakan:-

- a. jumlah permohonan yang ditawarkan, jumlah yang menerima tawaran dan melapor diri untuk kemasukan ke matrikulasi bagi tahun 2019 mengikut pecahan kaum; dan
- b. apakah fenomena kekurangan kemasukan pelajar bagi aliran sains berlaku lagi? Jika ya, berapa ramai dan apakah tindakan susulan Kementerian.

JAWAPAN

Tuan Yang di-Pertua,

- (a) Untuk makluman Ahli Yang Berhormat, bagi sesi 2019/2020, seramai 55,324 orang murid lepasan Sijil Pelajaran Malaysia (SPM) telah ditawarkan untuk mengikuti Program Matrikulasi Kementerian Pendidikan. Penawaran dilaksanakan berdasarkan keputusan Mesyuarat Jemaah Menteri pada 24 April 2019 yang bersetuju supaya dasar pengambilan pelajar ke Program Matrikulasi Kementerian Pendidikan dikekalkan kepada 90 peratus untuk pelajar Bumiputera dan 10 peratus untuk pelajar bukan Bumiputera. Selain itu, mulai sesi 2019/2020 sebanyak 60 peratus tempat di Program Matrikulasi Kementerian Pendidikan diperuntukkan kepada pelajar daripada golongan berpendapatan rendah (B40) sebagai salah satu inisiatif Kementerian untuk memberikan akses dan peluang pendidikan kepada yang layak untuk mengikuti Program Matrikulasi Kementerian Pendidikan dengan keutamaan diberikan kepada golongan B40.

Daripada jumlah tawaran tersebut, enrolmen Program Matrikulasi Kementerian Pendidikan bagi sesi 2019/2020 adalah seramai 22,655 orang pelajar bumiputera, 1,774 orang pelajar kaum Cina, manakala kaum India pula seramai 1,212 orang dan seramai 278 daripada kaum-kaum lain.

- (b) Program Matrikulasi merupakan program yang telah diwujudkan pada tahun 1999 dengan tujuan asal adalah untuk meningkatkan penyertaan pelajar bumiputera dalam bidang sains, teknologi dan profesional di universiti awam. Statistik enrolmen pelajar Program Matrikulasi Kementerian Pendidikan yang mengambil aliran sains menunjukkan peningkatan iaitu daripada 18,839 orang pada tahun 2017, kepada 20,324 orang pada tahun 2018, dan 22,678 orang pada tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 15 OKTOBER 2019 (SELASA)

SOALAN NO. 9

minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan pendirian Kementerian mengenai harga karbon dan pelaksanaan cukai karbon di loji kuasa mengikut polisi Kerajaan Singapura baru-baru ini, berdasarkan kelulusan resolusi AIPA terhadap harga karbon pada bulan Ogos 2019.

JAWAPAN

Tuan Yang di-Pertua,

Untuk makluman Ahli Yang Berhormat,

1. Paris Agreement telah dipersetujui oleh semua negara Parti kepada UNFCCC pada 12 Disember 2015. Antara kandungan Paris Agreement adalah mengenai pembangunan dan pelaksanaan mekanisme pendekatan kerjasama (*cooperative approaches*), mekanisme pasaran (*market mechanism*) dan mekanisme bukan pasaran (*non-market mechanism*) di bawah Artikel 6.
2. Walau bagaimanapun, pembangunan garis panduan bagi pelaksanaan Artikel 6 kepada Paris Agreement ini masih dirundingkan. Dijangkakan proses rundingan Artikel 6 ini akan dimuktamadkan semasa Persidangan UNFCCC COP-25 di Santiago, Chile pada hujung tahun ini.
3. Dalam masa yang sama, adalah penting supaya pembangunan kerangka perundangan perubahan iklim yang dicadangkan untuk selari dengan hasil rundingan Artikel 6 kepada Paris Agreement.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG [KOTA
SAMARAHAN]**

TARIKH : 15 OKTOBER 2019 (SELASA)

SOALAN NO : 10

Minta **MENTERI PERTANIAN DAN INDUSTRI ASAS TANI** menyatakan langkah terkini daripada pihak Kementerian dalam menggalakkan pertanian secara moden seperti pertanian *fertigation* di kalangan petani di negara ini.

JAWAPAN

Tuan Yang Dipertua,

1. Untuk makluman Ahli Yang Berhormat, Kementerian ini sentiasa memberi galakan kepada kumpulan sasar untuk mengusahakan aktiviti pertanian secara moden dengan aplikasi teknologi dan inovasi. Usaha ke arah galakan ini akan dipertingkatkan melalui antara lain penyebaran penggunaan teknologi mekanisasi dan automasi dan pembangunan model pertanian moden seperti yang telah digariskan dalam Hala Tuju Kementerian Pertanian dan Industri Asas Tani di bawah Prioriti dan Strategi bagi tempoh 2019-2020.

2. Keprihatinan Kerajaan terhadap inisiatif pertanian moden ini juga dapat dilihat semasa pembentangan Bajet 2020 apabila sebanyak RM43 juta telah diperuntukkan ke arah pembangunan Industri Pertanian 4.0 bagi membangunkan baka yang berkualiti dan berproduktiviti tinggi, seterusnya dapat memacu ekonomi negara melalui sektor agromakanan. Penggunaan teknologi pertanian moden ini juga dijangka dapat menarik lebih ramai anak muda untuk menceburi bidang pertanian pada masa hadapan.

3. Selain itu, Kementerian juga telah mengambil pelbagai langkah dari masa ke semasa untuk menggalakkan pertanian secara moden seperti berikut:

- a) memperkenalkan inovasi terkini seperti teknologi benih bermutu tinggi, teknologi cantuman dewasa tanaman buah-buahan, penggunaan dron bagi tujuan pembajaan dan penyemburan racun serta kaedah penanaman hidroponik bertingkat (*vertical farming*) bagi meningkatkan kepadatan tanaman pada ruang yang terhad;
- b) melaksanakan kajian dan prototaip kejuruteraan seperti pembangunan pakej teknologi pertanian tepat, agro robotik, aplikasi berasaskan *Internet of Things* (IoT), model kilang tanaman, pencahayaan menggunakan LED, sistem

pengairan secara automasi, pengenalpastian perosak dan penyakit tanaman melalui kecerdasan buatan (*artificial intelligence*) serta pembangunan analitis data raya pertanian (*big analytical data*);

- c) membangunkan aplikasi mudah alih yang boleh diakses menggunakan telefon pintar dan peranti mudah alih yang lain;
- d) memberi pelbagai bantuan berbentuk insentif amalan pakej teknologi kepada para petani seperti pembangunan infrastruktur ladang, pemberian input pertanian dan peralatan kecil pertanian mengikut keperluan;
- e) menganjurkan program-program penemusuaian antara petani dan pihak industri dan syarikat-syarikat teknologi bagi mempercepatkan pemindahan teknologi moden;
- f) menyediakan kursus dan latihan khas dalam bidang *Internet of Things* atau IoT seperti Program Latihan *Flagship Agropreneur Muda MARDI (AGORA)*. Program ini dilaksanakan secara bersiri di seluruh negara sejak tahun 2016; serta
- g) menggalakkan aktiviti pengembangan dan latihan berkaitan teknologi pertanian moden dan inovasi terkini kepada petani selain memperkasa petani melalui persatuan dan koperasi bagi membolehkan akses kepada penggunaan teknologi pertanian moden secara kelompok.

4. Seajar dengan Revolusi Industri 4.0, Kementerian ini akan memberikan perhatian khusus dan penekanan terhadap teknologi pertanian moden dalam Dasar Agromakanan Negara 2.0 (2021-2030) dan Rancangan Malaysia Ke-12 (2021-2025) yang sedang dirangka dan dirancang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO DR NOOR AZMI BIN GHAZALI
(BAGAN SERAI)**

TARIKH : 15 OKTOBER 2019

SOALAN

DATO' DR. HAJI NOOR AZMI BIN GHAZALI [BAGAN SERAI] minta **MENTERI DALAM NEGERI** menyatakan mengapakah kebanyakan mereka yang ditangkap serta dipenjarakan berkaitan penagihan dadah adalah daripada golongan miskin dan adakah masa depan mereka ini akan lebih musnah kerana kehilangan kerja, dipencilkan dan dianggap sebagai bekas banduan.

JAWAPAN

Tuan Yang Di Pertua,

Terima kasih Yang Berhormat Bagan Serai. Untuk makluman Yang Berhormat, berdasarkan kepada satu kajian yang bertajuk 'Kajian Impak Program Pemulihan Banduan' yang telah dibuat Universiti Pertanian Malaysia yang telah dilaksanakan oleh salah sebuah institusi pengajian tinggi awam di Malaysia terhadap 4723 orang responden ataupun banduan pada tahun 2016 menunjukkan majoriti banduan yang terlibat dengan kesalahan dadah tergolong dalam kumpulan berpendapatan 40 peratus terendah ataupun B40 dan tinggal di kawasan bandar ataupun miskin bandar.

Kajian tersebut juga menunjukkan perubahan struktur ekonomi turut mengubah struktur sosial apabila cara hidup seseorang berubah mengikut gelombang pertumbuhan ekonomi dan peningkatan kos sara hidup di bandar menjadi salah satu faktor keterlibatan banduan dalam salah laku jenayah.

Berdasarkan dengan situasi di atas serta stigma masyarakat terhadap bekas banduan, Jabatan Penjara Malaysia telah berusaha melatih dan membina semula masa depan banduan agar mereka insaf, pulih, berkemahiran, mampu berdikari serta tidak mengulangi kesilapan setelah dibebaskan kelak. Langkah ini adalah selaras dengan prinsip pentadbiran Jabatan Penjara Malaysia seperti mana ketetapan pada Peraturan 3(1)(c), Peraturan-peraturan Penjara Tahun 2000.

Di samping itu, program pembangunan insan iaitu modul pemulihan khusus yang telah dibina oleh Jabatan Penjara Malaysia turut menerapkan bidang kemahiran dalam fasa pemulihannya agar banduan yang terlibat menjadi sumber manusia yang produktif dan mampu menyumbang kembali kepada masyarakat.

Demi kepentingan pemulihan dan asimilasi semula ke dalam masyarakat, Kementerian Dalam Negeri melalui Jabatan Penjara Malaysia telah melaksanakan pelbagai program latihan kemahiran dan pemulihan termasuklah akademik yang boleh dipraktikkan setelah dibebaskan.

[Tuan Yang di-Pertua mempengerusikan mesyuarat]

Antara langkah-langkah tersebut, kalau saya hendak senaraikan agak panjang tetapi saya akan menyebut beberapa:-

(i) menggalakkan pembelajaran akademik kepada banduan di peringkat persekolahan dan pengajian tinggi. Pada masa kini terdapat seramai 1256 orang penghuni penjara mengikut pembelajaran akademik dan 34 orang daripada mereka kini sedang menyambung pengajian di peringkat diploma, sarjana muda, sarjana dan juga doktor falsafah (PhD);

(ii) latihan secara tidak bersijil dan bersijil di bengkel-bengkel perusahaan ataupun amanah ataupun usaha sama. Penghuni yang terlibat diberikan

insentif yang boleh digunakan setelah dibebaskan. Pada ketika ini terdapat seramai 8260 orang penghuni sedang mengikuti latihan kemahiran di 486 bengkel perusahaan, akaun amanah dan usaha sama;

(iii) semenjak latihan kemahiran dilaksanakan mulai tahun 2012 sehingga Ogos 2019, seramai 19,010 orang penghuni telah didaftarkan untuk mengikuti Program Sistem Latihan Dual Nasional dan 14,870 orang penghuni telah berjaya menerima sijil kemahiran tersebut dengan kerjasama Kementerian Sumber Manusia dan latihan pekerjaan turut ditawarkan kepada banduan termasuk orang diparol melalui Program Reintegrasi Penghuni Industri (PRPI) dan Corporate Smart Internship dengan syarikat swasta dan syarikat berkaitan dengan kerajaan. Pada ketika ini terdapat seramai 86 banduan yang sedang mengikuti Program Reintegrasi Penghuni Industri dan seramai 1,053 orang diparol mengikut Program Korporat Smart Internship. Banduan dan orang diparol tersebut boleh meneruskan pekerjaan berkenaan setelah mereka dibebaskan.

Sebenarnya banyak lagi kalau saya hendak teruskan. Cuma agak masa tidak mengizinkan. Cuma untuk maklumat Ahli Yang Berhormat, pihak Agensi Antidadah Kebangsaan juga melaksanakan pelbagai program pemulihan terhadap banduan yang dibebaskan setelah selesai menjalani hukuman di bawah Seksyen 15(1)(a) Akta Dadah Berbahaya Tahun 1952 akan diperintahkan oleh mahkamah menurut peruntukan Seksyen 38B akta yang sama untuk menjalani program pengawasan pegawai pemulihan di bawah Akta Penagihan Dadah (Rawatan dan Pemulihan) 1983.

Program pengawasan ini Tuan Yang di-Pertua tidak menyisihkan bekas banduan tetapi membolehkan mereka mengekalkan kepulihan dan mengamalkan gaya hidup yang berkualiti. Pengawasan secara berterusan ini penting dalam menangani masalah penagihan semula ataupun relapse prevention. Dalam hal ini AADK telah menyediakan perkhidmatan rawatan dan pemulihan di dalam komuniti yang boleh diperolehi di pejabat AADK daerah dan Pusat Integrasi Klien dengan Program Bio Psiko Sosial serta melaksanakan latihan kerjaya dan peluang penempatan pekerjaan yang bersesuaian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 15 OKTOBER 2019 (SELASA)

SOALAN NO. 12

Minta **MENTERI PENDIDIKAN** menyatakan langkah-langkah atau kaedah-kaedah untuk menilai prestasi perkhidmatan talian Internet ke sekolah-sekolah seluruh negara yang dibekalkan oleh tiga (3) syarikat penyedia perkhidmatan Internet (ISP) iaitu Telekom Malaysia Berhad, Celcom Axiata Berhad dan Maxis Broadband Sdn. Bhd. mulai 1 Julai 2019. Nyatakan status dan statistik tawaran menyediakan perkhidmatan Internet sementara ke sekolah mengikut setiap satu ISP tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah memutuskan satu kebijaksanaan baharu dalam pembekalan perkhidmatan talian internet ke sekolah di seluruh negara iaitu, dengan memberi kontrak kepada tiga (3) syarikat penyedia perkhidmatan internet (ISP) terkemuka negara yang terdiri daripada Telekom Malaysia Berhad, Celcom Axiata Berhad dan Maxis Broadband Sdn. Bhd.

Perkhidmatan ini adalah bagi tempoh interim enam (6) bulan iaitu bermula 31 Julai 2019 hingga 31 Disember 2019. Selepas melakukan penilaian dan penambahbaikan yang diperlukan, KPM akan memilih penyedia perkhidmatan internet yang baharu bagi tempoh mulai 1 Januari 2020.

Untuk makluman Ahli Yang Berhormat, bagi tujuan penilaian prestasi perkhidmatan talian internet ke sekolah-sekolah oleh ketiga-tiga ISP tersebut, KPM menggunakan pengujian *speedtest* sebagai kaedah untuk menilai dan mendapatkan prestasi kelajuan talian internet yang dibekalkan.

Berdasarkan rekod KPM, statistik pemasangan talian internet ke sekolah oleh Telekom Malaysia Berhad adalah sebanyak 2,320 buah sekolah. Celcom Axiata Berhad sebanyak 5,245 dan Maxis Broadband Sdn. Bhd. sebanyak 2,366 buah sekolah.

Manakala, sebanyak 274 buah sekolah telah dikategorikan sebagai *unserved* oleh ketiga-tiga ISP. Perkara ini telah diangkat kepada Kementerian Kewangan untuk membenarkan sekolah-sekolah *unserved* tersebut membuat langganan terus kepada ISP yang mempunyai liputan terbaik di lokasi berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : PUAN NOR AZRINA BINTI SURIP [MERBOK]
TARIKH : 15 OKTOBER 2019 (SELASA)

SOALAN NO. 13

minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan tindakan yang akan diambil oleh Kerajaan sekiranya syarikat Lynas tidak dapat memenuhi syarat yang dikenakan dalam tempoh masa enam bulan. Adakah Kerajaan akan menggantung operasi Lynas sehingga mereka memenuhi syarat berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, merujuk Seksyen 22 (1) Akta Perlesenan Tenaga Atom 1984 (Akta 304), sekiranya pemegang lesen telah melanggar mana-mana syarat lesen, Kerajaan melalui Lembaga Perlesenan Tenaga Atom boleh membatalkan atau menggantung selama tempoh yang difikirkan patut terhadap mana-mana lesen yang dikeluarkan termasuk lesen kepada Lynas Malaysia Sdn. Bhd.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. SHAMSUL ANUAR BIN HAJI
NASARAH (LENGGONG)**

TARIKH : 15 OKTOBER 2019 (SELASA)

SOALAN

Minta **MENTERI PERTAHANAN** menyatakan sejauh manakah kebenaran dakwaan bahawa Syarikat Boustead milik Lembaga Tabung Angkatan Tentera di dalam proses untuk menjual pegangannya di dalam Boustead Petroleum Marketing Sdn Bhd (BPM) yang mengendalikan operasi syarikat BHPetrol.

JAWAPAN

Tuan Yang di-Pertua,

Boustead Holdings Berhad iaitu anak syarikat Lembaga Tabung Angkatan Tentera (LTAT) dengan pegangan 59.45% ekuiti merupakan syarikat konglomerat yang melabur di dalam pelbagai sektor ekonomi di Malaysia. Antara pelaburan tersebut adalah di dalam Boustead Petroleum Marketing Sdn Bhd (BPM), iaitu sebuah syarikat yang menjual secara runcit bahan api petrol, diesel, gas LPG dan minyak pelincir. BPM sehingga kini mempunyai 386 buah stesen minyak di seluruh Malaysia. Pemegang saham syarikat BPM adalah Boustead Petroleum Sdn Bhd dengan pegangan 70% ekuiti, manakala LTAT pula memegang baki 30% ekuiti.

Boustead Holdings sentiasa meninjau peluang-peluang untuk menjana keuntungan maksimum bagi memberi pulangan pelaburan yang terbaik kepada pemegang sahamnya termasuk LTAT. Pada masa ini, BPM merupakan penyumbang utama kepada Boustead Holdings dan masih memberi pulangan yang baik kepada pemegang sahamnya. Buat masa ini, Lembaga Pengarah Boustead Holdings tidak bercadang untuk menjual BPM kepada mana-mana pihak.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AWANG HUSAINI BIN SAHARI
[PUTATAN]**

TARIKH : 15 OKTOBER 2019 (SELASA)

SOALAN NO: 15

Minta **MENTERI PERTANIAN DAN INDUSTRI ASAS TANI** menyatakan Dewan Undangan Negeri Sabah pada bulan November 2018 telah meluluskan Pindaan terhadap Sekyen 4 Ordinan Tanah (Bab 68) yang memperhalusi takrifan tanah dengan memasukkan dasar mana-mana sungai, tasik serta kawasan lautan dalam pelantar benua bersempadan dengan perairan wilayah Sabah. Ianya membolehkan negeri Sabah menuntut sebarang cukai jualan ke atas apa sahaja hasil laut serta aktiviti di atas mahupun di dasar laut. Soalannya, apakah pendirian Kementerian dalam usaha untuk menyerahkan kawalan sepenuhnya kepada Kerajaan Negeri Sabah untuk menguruskan hasil lautnya sendiri.

JAWAPAN

Tuan Yang Dipertua,

1. Kementerian mengambil maklum berhubung pindaan terhadap Sekyen 4 Ordinan Tanah (Bab 68) oleh Kerajaan Negeri Sabah yang memperhalusi takrifan tanah. Pindaan ini turut melibatkan perkara berhubung perikanan yang di bawah kawal selia Kementerian Pertanian dan Industri Asas Tani.
2. Perkara berhubung perikanan termasuk penangkapan ikan dan perikanan kelautan dan muara (tidak termasuk penyu) adalah suatu perkara yang disenaraikan dalam Senarai Persekutuan di bawah butiran 9 Senarai I dalam Jadual Kesembilan kepada Perlembagaan Persekutuan dan juga perkara yang sama disenaraikan dalam Senarai Bersama di bawah butiran 12 Senarai IIIA dalam Jadual Kesembilan tersebut berkenaan dengan Negeri-negeri Sabah dan Sarawak.
3. Dalam hal ini, perkara berhubung penangkapan ikan dan perikanan kelautan dan muara negeri Sabah merupakan salah satu tuntutan Kerajaan Negeri Sabah dalam Semakan Perjanjian Malaysia (MA63).
4. Perundingan berhubung tuntutan Kerajaan Negeri Sabah mengenai perikanan masih lagi berjalan di antara kedua-dua pihak.
5. Kementerian faham bahawa Kerajaan Negeri Sabah mempunyai hak dalam menuntut kuasa perikanan sebagaimana Butiran 12 Senarai IIIA Senarai Bersama Jadual Kesembilan Perlembagaan Persekutuan. Walau bagaimanapun, perbincangan antara Kementerian dan Kerajaan Negeri Sabah yang sedang berlangsung ini perlu diteruskan dan amat penting bagi memastikan keputusan yang diambil berkaitan hal perikanan kelak adalah keputusan yang tepat bagi kedua-dua pihak. Perbincangan ini akan memperhalusi segala implikasi yang terlibat demi memelihara kepentingan sektor perikanan negara secara keseluruhannya termasuk mengambil kira keperluan domestik dan antarabangsa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI HISHAMMUDDIN BIN TUN
HUSSEIN [SEMBRONG]**

TARIKH : 15 OKTOBER 2019 (SELASA)

SOALAN NO. 16

Minta **MENTERI PENDIDIKAN** menyatakan adakah Kementerian bercadang untuk menggubal Dasar Pendidikan Kebangsaan bagi memupuk integrasi dan perpaduan kaum di kalangan pelajar dan apakah strategi pelaksanaannya.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan komited dalam memupuk dan memperkukuhkan perpaduan dalam kalangan murid dan pelajar pelbagai kaum sama ada di peringkat sekolah atau di institusi pendidikan tinggi (IPT). Langkah ini selari dengan Dasar Pendidikan Kebangsaan yang sedang diguna pakai pada masa sekarang. Bagi merealisasikan matlamat Dasar Pendidikan Kebangsaan, KPM telah melaksanakan pelbagai usaha melalui program sedia ada dalam aktiviti kurikulum dan kokurikulum. Bagi memastikan usaha perpaduan dan integrasi kaum berlaku dan mendapat impak yang optimum, KPM telah melaksanakan pelbagai aktiviti atau program yang melibatkan murid, pelajar, guru, pensyarah dan pihak pentadbir di semua institusi pendidikan.

Bagi tujuan tersebut, KPM telah memasukkan elemen patriotisme, perpaduan dan kecintaan terhadap agama, bangsa dan negara dalam kurikulum kebangsaan melalui Kurikulum Standard Prasekolah

Kebangsaan, Kurikulum Standard Sekolah Rendah dan Kurikulum Standard Sekolah Menengah dalam mata pelajaran Sejarah, Pendidikan Islam, Pendidikan Moral serta melalui pendekatan merentas kurikulum dalam mata pelajaran lain.

Selain daripada itu, KPM juga telah menyediakan dan mengedarkan Garis Panduan Pelaksanaan Amalan Harian Bagi Perpaduan Di Sekolah Kementerian Pendidikan Malaysia ke semua sekolah di seluruh negara melalui Surat Pekeliling Ikhtisas (SPI) Kementerian Pendidikan Malaysia Bilangan 9 tahun 2018 bertarikh 9 November 2018. Garis panduan ini bertujuan untuk memberi panduan kepada pengetua dan guru besar dalam pelaksanaan amalan harian bagi perpaduan di sekolah KPM.

KPM juga sedang dalam proses memperkasakan semula Pendidikan Sivik dan Kewarganegaraan (PSK) dengan penekanan kepada literasi sivik bagi memastikan murid dapat membudayakan sivik melalui pengetahuan sivik, sosio-emosi sivik dan tindakan sivik. Pemerkasaan semula PSK dibuat secara bersepadu merentas pelbagai mata pelajaran seperti Sejarah, Pendidikan Moral, Pendidikan Agama Islam, Bahasa Melayu dan Bahasa Inggeris. Pendidikan Sivik ini juga turut memberi penekanan kepada tindakan sivik dalam aktiviti kokurikulum, Perhimpunan Mingguan Sekolah dan aktiviti di sekolah. Pemerkasaan semula mata pelajaran PSK ini merupakan satu langkah untuk memupuk nilai-nilai murni dan membentuk keperibadian dalam usaha membendung dan menangani keruntuhan akhlak dan moral dalam kalangan generasi anak-anak muda serta menimbulkan rasa tanggungjawab dan cinta terhadap negara.

Terkini, melaksanakan Modul Pendidikan Sivik memberi penekanan kepada nilai dan teras kemanusiaan turut menjadikan integrasi dan perpaduan sebagai elemen penting dengan memasukkan beberapa elemen perpaduan sebagai nilai teras, antara tajuk nilai teras tersebut ialah 'Negara Kita Tanggungjawab Kita'. Di bawah nilai teras ini, terdapat beberapa tajuk utama yang berkaitan dengan perpaduan seperti sambutan Hari Kebangsaan, Hari Malaysia, bangga dengan pemimpin negeri/negara, bangga dengan warisan budaya dan banyak lagi.

Perpaduan merupakan agenda utama sistem pendidikan yang diberi tumpuan oleh KPM. Sehubungan itu, di peringkat pendidikan tinggi, KPM komited untuk memastikan bahawa enrolmen di institusi pendidikan tinggi menggambarkan perpaduan dalam kepelbagaian kaum di Malaysia. Hal ini bertujuan membentuk sistem pendidikan yang membolehkan pelajar memahami nilai serta berkongsi pengalaman dan aspirasi. Indeks Patriotisme dan Perpaduan turut dilaksanakan kepada pelajar di IPT sebagai salah satu usaha untuk menentukan tahap perpaduan dalam kalangan mahasiswa. Satu Jawatankuasa pembangunan kursus telah ditubuhkan dan dianggotai oleh pakar-pakar dalam bidang falsafah dan etika. Jawatankuasa ini dipengerusikan oleh Tan Sri Dato' Prof. Emeritus Dzulkifli Abdul Razak, Rektor Universiti Islam Antarabangsa Malaysia.

KPM juga telah memperkenalkan dua kursus baharu iaitu (i) Kursus Falsafah dan (ii) Isu Semasa dan Kursus Penghayatan Etika dan Peradaban. Dua kursus ini dirangka khas bagi memperkasakan penghayatan falsafah dalam kalangan pelajar sebagai asas bagi menjalin dialog antara budaya dan memupuk nilai sepunya. Kursus-kursus ini wajib diambil oleh pelajar IPT dari peringkat sijil hingga Sarjana Muda mengikut struktur penawaran Mata Pelajaran Umum (MPU) yang telah ditetapkan dalam buku Garis Panduan MPU. Pelajar boleh mengambil kursus-kursus ini pada bila-bila masa di sepanjang tempoh pengajian masing-masing.

Selain daripada itu, KPM juga sedang meneliti kebolehlaksanaan syor Jawatankuasa Dasar Pendidikan Negara (JKDPN) bagi menambah baik penyampaian pendidikan termasuklah syor-syor yang berkaitan memupuk integrasi dan perpaduan kaum dalam kalangan pelajar di sekolah dan peringkat pendidikan tinggi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN TEH KOK LIM (TAIPING)

TARIKH : 15 OKTOBER 2019

SOALAN

TUAN TEH KOK LIM [TAIPING] minta **MENTERI DALAM NEGERI** menyatakan jumlah bilangan kanak-kanak yang dilahirkan di Malaysia tanpa status kewarganegara dan rancangan pihak Kementerian menangani isu tersebut.

JAWAPAN

Tuan Yang Di Pertua,

Berhubung dengan bilangan individu tanpa kewarganegaraan yang dilahirkan di Malaysia seperti yang dibangkitkan oleh Ahli Yang Berhormat, Kementerian Dalam Negeri (KDN) melalui Jabatan Pendaftaran Negara (JPN) hanya merekodkan status seseorang individu sebagai warganegara atau bukan warganegara berdasarkan kepada status perkahwinan dan taraf kewarganegaraan ibu bapa kandung sewaktu kelahiran berlaku. Justeru itu, JPN tidak mempunyai rekod individu tanpa status kewarganegaraan di Malaysia.

Untuk makluman, KDN telah memuktamadkan pengemaskinian prosedur pengendalian standard (SOP) permohonan kewarganegaraan di bawah Perkara 15A Perlembagaan Persekutuan bagi individu berumur bawah 21 tahun. SOP berkenaan yang akan dilaksanakan bermula tahun hadapan, mengandungi mekanisme pemakluman kepada pemohon berkaitan sebab-sebab sesuatu permohonan kewarganegaraan itu ditolak serta

tempoh pemprosesan permohonan kewarganegaraan. Tempoh pemprosesan permohonan kewarganegaraan yang lengkap diterima bermula pada tahun hadapan adalah seperti mana berikut:-

- a. Di Jabatan Pendaftaran Negara (JPN): tiga (3) bulan, 14 hari; dan
- b. Di Kementerian Dalam Negeri (KDN): lapan (8) bulan.

Manakala, bagi permohonan kewarganegaraan lain di bawah Perlembagaan Persekutuan, fakta dan dokumen sokongan yang dikemukakan oleh setiap pemohon akan diteliti secara *case-by-case* mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes termasuklah tempoh mendapatkan laporan tapisan keselamatan yang dijalankan Polis Diraja Malaysia (PDRM).

Untuk makluman Ahli Yang Berhormat, penambahbaikan SOP berkenaan adalah berdasarkan kepada pematuhan syarat di bawah Bahagian III Perlembagaan Persekutuan dan *Citizenship Rules* 1964 [LN82/1964] serta turut mengambil kira pelbagai aspek termasuklah kebajikan pemohon tanpa mengabaikan keselamatan dan kesejahteraan warganegara sedia ada.

Sukacita diingatkan bahawa ibu bapa dan penjaga kepada individu yang bertaraf Bukan Warganegara adalah bertanggungjawab sepenuhnya untuk menguruskan kewarganegaraan, dokumen pengenalan diri dan dokumen perjalanan dengan negara asal bagi mengelakkan ketiadaan dokumen pengenalan diri, keberadaan tidak sah di Malaysia dan seterusnya disalah anggap sebagai tidak memiliki kewarganegaraan dari mana-mana negara (*stateless*).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI REEZAL MERICAN BIN
NAINA MERICAN [KEPALA BATAS]**

TARIKH : 15 OKTOBER 2019 (SELASA)

SOALAN NO. 18

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan mengapakah Kementerian memutuskan untuk meliberalisasikan industri bekalan tenaga elektrik sedangkan Tenaga Nasional Berhad mempunyai rekod cemerlang semenjak penubuhannya.

JAWAPAN

Tuan Yang di-Pertua,

Untuk makluman Ahli Yang Berhormat,

1. Program *Reimagining Malaysian Electricity Supply Industry* atau dikenali sebagai MESI 2.0 merangkumi empat (4) inisiatif berikut:
 - (i) memperkenalkan inisiatif baharu bagi pembangunan loji-loji jana kuasa dengan mewujudkan pasaran kapasiti penjanaan (*capacity market*) dan pasaran elektrik (*energy market*) melalui pelaksanaan mekanisme-mekanisme baru yang akan menggantikan mekanisme pembelian tenaga melalui *Power Purchase Agreement* (PPA);

- (ii) menyediakan persekitaran kondusif bagi menggalakkan penjana-penjana elektrik mendapatkan bekalan bahan api dari pasaran pada harga yang kompetitif;
 - (iii) membuka akses kepada pihak ketiga (*Third Party Access - TPA*) bagi membolehkan pihak selain daripada Tenaga Nasional Berhad (TNB) menggunakan talian penghantaran dan pengagihan untuk melaksanakan transaksi penjualan dan pembelian elektrik di antara kedua-dua pihak, tanpa melibatkan TNB; dan
 - (iv) membolehkan pengguna memilih pembekal elektrik selain TNB melalui pembukaan sektor peruncitan elektrik.
2. Bagi memastikan industri pembekalan elektrik bersedia untuk menghadapi cabaran akan datang, atau *future-proof* dengan izin, dan berdaya maju atau *sustainable* dengan izin, Kerajaan telah memutuskan supaya program *Reimagining Malaysian Electricity Supply Industry* atau dikenali sebagai MESI 2.0 dilaksanakan.
3. Selain itu, liberalisasi sektor bekalan elektrik ini juga akan dapat meningkatkan lagi persaingan dan ketelusan industri. Dengan adanya persaingan yang lebih tinggi, TNB akan dapat meningkatkan lagi kecekapan operasi syarikat berkenaan dan seterusnya menawarkan tarif yang lebih kompetitif kepada pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 15 OKTOBER 2019 (SELASA)

SOALAN NO. 19

Minta **MENTERI PENDIDIKAN** menyatakan rasional Kementerian mengumumkan cadangan menggabungkan dua buah universiti di Terengganu iaitu Universiti Malaysia Terengganu (UMT) dan Universiti Sultan Zainal Abidin (UniSZA).

JAWAPAN

Tuan Yang di-Pertua,

Mesyuarat Jemaah Menteri pada 5 April 2019 telah mencadangkan supaya kedua-dua universiti ini digabungkan kerana mengambil kira beberapa faktor terutamanya untuk mempertingkatkan kualiti perkhidmatan, memberi nilai tambah kepada mahasiswa, fakulti serta komuniti setempat.

Sehubungan dengan itu, Kementerian Pendidikan Malaysia (KPM) telah menubuhkan satu Jawatankuasa Pemandu yang diketuai oleh Ketua Pengarah Pendidikan Tinggi (KPPT) untuk memastikan proses penggabungan ini dapat dilaksanakan dengan efisien dan efektif.

Melalui perbincangan awal pada 26 dan 27 September 2019, UMT dan UniSZA telah bersetuju untuk menggunakan peluang penggabungan ini bagi memperkasakan lagi kebitaraan bidang fokus kedua-dua buah universiti.

Beberapa sesi libat urus awal juga telah diadakan bersama-sama pihak berkepentingan universiti iaitu Pengerusi LPU, pengurusan tertinggi, wakil-wakil staf akademik, staf pentadbiran dan sokongan, mahasiswa dan alumni.

Kementerian juga telah mendapatkan maklumbalas daripada wakil-wakil agensi persekutuan seperti Jabatan Perkhidmatan Awam (JPA), Kementerian Kewangan (MOF), Jabatan Peguam Negara (AGC) dan Kementerian Hal Ehwal Ekonomi (MEA).

Sesi libat urus bersama Gabungan Majlis Presiden Dan Setiausaha Kehormat Kesatuan Kakitangan Universiti/IPTA Malaysia (GAKUM) juga telah dilaksanakan untuk mendapatkan maklum balas awal tentang proses penggabungan ini.

Dapatan awal perbincangan dengan pihak berkepentingan ini telah memperlihatkan keupayaan dan potensi UMT dan UniSZA sebagai sebuah universiti baharu yang menjadi peneraju terulung dalam

NO. SOALAN: 19

integrasi keilmuan Islam dan sains terutamanya dalam bidang Ilmu Peradaban Islam dan Sains Kelautan. Ini termasuk:

- a) Melonjakkan pencapaian dan kecemerlangan akademik, penyelidikan dan pengantarabangsaan;
- b) Melipat ganda kapasiti, keberhasilan dan impak sumber manusia, kepakaran dan fasiliti universiti;
- c) Perluasan akses dan kemudahan, fasiliti, infrastruktur kepada para pelajar dan kakitangan. Perluasan akses dan kemudahan ini akan mempertingkatkan kualiti pembangunan pelajar dari segi akademik dan sahsiah; dan
- d) Menjadi sebuah pusat rujukan kebitaraan di peringkat global dalam era merentas disiplin (transdisciplinary).

Penggabungan ini dijangka bakal memperkasakan hub pendidikan tinggi di negeri Terengganu serta memperkukuhkan kebitaraan bidang fokus sedia ada. Dalam masa yang sama ia juga akan mengembangkan kebitaraan bidang fokus baharu dapat yang diwujudkan melalui aktiviti transdisciplinary.

Walaupun bagaimanapun, Kerajaan akan memastikan penggabungan ini tidak akan merugikan mana-mana pihak yang terlibat kerana ia dapat melonjakkan prestasi dan pencapaian universiti ke tahap yang lebih cemerlang di peringkat negara dan antarabangsa.

Dalam masa yang sama, perkara ini masih di dalam peringkat Jawatankuasa Pemandu. Sesi libat urus bersama pihak berkepentingan akan diteruskan bagi melibatkan lebih ramai pemegang taruh dalam proses perbincangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB DATUK DR. JEFFREY KITINGAN(KENINGAU)

TARIKH : 15 OKTOBER 2019

SOALAN

DATUK DR. JEFFREY GAPARI KITINGAN [KENINGAU] minta **MENTERI DALAM NEGERI** menyatakan :-

(a) apakah rasional Kerajaan untuk mengeluarkan pas sementara Sabah untuk pemegang IMM13, Kad Burung-burung dan Sijil Banci yang merupakan warga asing dan bukan warganegara Malaysia; dan

(b) mengapa Kerajaan tidak mengambil langkah untuk menghantar mereka pulang ke negara asal memandangkan Kerajaan Filipina bersedia menerima mereka dan jika perlu mereka boleh memohon dokumen yang sah daripada Kerajaan mereka dan memohon secara sah dan teratur datang bekerja atau datang melawat Sabah.

JAWAPAN

Tuan Yang Di Pertua,

Pelaksanaan Pas Sementara Sabah (PSS) adalah bertujuan untuk menyeragamkan kepelbagaian dokumen yang dimiliki oleh warga asing atau *displaced person* di Sabah iaitu pemegang dokumen IMM13 yang dikeluarkan oleh Jabatan Imigresen Malaysia, Kad Burung-Burung yang dikeluarkan oleh Jabatan Ketua Menteri Sabah dan Sijil Banci yang dikeluarkan oleh Pasukan Petugas Khas Persekutuan Sabah, Majlis

Keselamatan Negara Sabah. Keseragaman dokumen ini dilakukan bagi memudahkan pengecaman dan operasi oleh pihak penguatkuasa.

PSS hanya akan dikeluarkan kepada pemegang dokumen sedia ada yang telah disahkan oleh agensi pengeluar yang berkaitan. Selain itu, semakan silang data antara agensi juga dilaksanakan bagi memastikan pemegangnya adalah tulen sebelum PSS dikeluarkan.

Untuk makluman Ahli Yang Berhormat, dokumen pengenalan diri seperti Kad Burung-Burung dan Sijil Banci tidak diiktiraf oleh agensi penguatkuasa kerana dokumen tersebut bukan merupakan dokumen imigresen bagi tujuan keberadaan di Malaysia selaras dengan Peraturan 8, Peraturan-Peraturan Imigresen 1963. Sehubungan itu, PSS adalah suatu dokumen imigresen yang membenarkan pemegangnya untuk tinggal secara sementara di Malaysia secara sah. PSS juga adalah sebagai mekanisme kawalan keberadaan dan pergerakan warga asing di Sabah. PSS akan dikeluarkan dalam bentuk kad yang mempunyai ciri-ciri keselamatan seperti biometrik dan mempunyai nombor ID yang unik yang membezakan PSS dengan pas-pas imigresen sedia ada.

PSS akan terbatal sekiranya pemegangnya disabitkan dengan kesalahan jenayah atau telah mendapat pasport daripada negara asal. Bagi warga asing yang telah mendapat pasport daripada negara asal, tindakan pengusiran akan dilaksanakan oleh JIM mengikut prosedur sedia ada. Sebelum sebarang dokumen perjalanan daripada negara asal diperolehi, warga asing ini perlu memegang PSS bagi tujuan rekod keberadaan dan pergerakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HAJI ABD. LATIFF BIN AHMAD
[MERSING]**

TARIKH : 15 OKTOBER 2019 (SELASA)

SOALAN NO. 21

Minta **MENTERI PENDIDIKAN** menyatakan adakah Kementerian bercadang merombak kurikulum beberapa program pengajian di universiti awam supaya memenuhi keboleh pasaran siswasah semasa. Setakat ini berapa peratus kadar graduan diambil bekerja selepas satu tahun tamat pengajian.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) dengan kerjasama universiti awam (UA) telah melaksanakan transformasi pendidikan tinggi awam melalui semakan semula kurikulum program akademik agar relevan dan terkini serta selaras dengan kemajuan teknologi IR 4.0. Bermula tahun 2017, UA telah menjalankan semakan semula terhadap program-program akademik yang ditawarkan.

Melalui semakan tersebut, UA telah mengenal pasti program akademik yang perlu dijumudkan, dibekukan atau dilupuskan bagi memberi laluan kepada penawaran program baharu yang memenuhi keperluan industri dan serta sejajar dengan keperluan IR4.0.

KPM turut melaksanakan saringan awal yang ketat terhadap setiap program akademik yang hendak ditawarkan oleh UA. Pihak UA

perlu menjalankan kajian analisis yang terperinci supaya program yang menjadi fokus dan keperluan guna tenaga negara sahaja yang ditawarkan. Program akademik yang ditawarkan juga mengambil kira keperluan guna tenaga dan bidang kritikal yang telah dikaji dan dibentangkan oleh pihak Jabatan Perkhidmatan Awam, Jabatan Perangkaan Malaysia, ILMIA, *Talentcorp*, *Jobstreet* dan agensi-agensi lain berkaitan yang turut hadir dalam mesyuarat saringan awal dan perakuan program.

Bagi program akademik yang dikekalkan dalam sistem penawaran adalah program yang menepati aspek keperluan tenaga negara, laluan kerjaya dan tahap kebolehpasaran graduan, tiada duplikasi program akademik sedia ada dalam kalangan institusi pendidikan tinggi (IPT), implikasi kewangan, perjawatan dan fizikal serta perkembangan polisi dan dasar terkini negara berkaitan bidang pendidikan tinggi agar relevan, berdaya saing serta memenuhi keperluan industri semasa selari dengan IR 4.0.

KPM sentiasa memastikan pengisian pembelajaran di peringkat universiti adalah selari dengan permintaan pasaran pekerjaan dan keperluan industri. Pelbagai program kerjasama yang terjalin antara pihak industri dan kementerian dengan bermatlamat ke arah meningkatkan kebolehpasaran graduan telah dilaksanakan dan berfokus kepada program berimpak tinggi. Antaranya melalui pengenalan *Academia Talent Exchange Programme (Al-xChange):CEO@ Faculty Programme*. Berdasarkan Sistem Kajian Pengesanan Graduan (SKPG) Tahun 2018 KPM, kadar graduan bekerja selepas satu tahun tamat pengajian adalah 61.2 peratus.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN AHMAD AMZAD B. MOHAMED @
HASHIM (KUALA TERENGGANU)**

TARIKH : 15 OKTOBER 2019

SOALAN

**TUAN HAJI AHMAD AMZAD BIN MOHAMED@HASHIM [KUALA
TERENGGANU]** minta **MENTERI DALAM NEGERI** menyatakan statistik
jenayah yang dilakukan oleh warga asing di Malaysia mengikut jenis-jenis
jenayah.

JAWAPAN

Tuan Yang Di Pertua,

Kementerian Dalam Negeri melalui Polis DiRaja Malaysia (PDRM) memandang serius berhubung penglibatan warga asing dalam aktiviti-aktiviti jenayah dinegara ini. Gejala ini jika tidak dibendung boleh menimbulkan perasaan takut dan menyebabkan kegusaran kepada masyarakat.

Berdasarkan statistik jenayah indeks bagi tempoh tahun 2016 hingga Ogos 2019, sebanyak 42,451 kes yang direkodkan yang melibatkan warga asing. Daripada jumlah tersebut kes jenayah yang paling banyak dilakukan oleh warga asing ialah kes curi dengan sebanyak 12,647 kes, diikuti oleh kes pecah rumah dan curi sebanyak 11,862 kes dan kes curi motosikal sebanyak 4,822 kes.

Dalam memastikan warga asing tidak terlibat dalam jenayah dan masalah sosial yang lain dari terus merebak dan boleh menjejaskan kerukunan dan keharmonian rakyat tempatan, pelbagai langkah dan usaha telah diambil oleh Polis Diraja Malaysia (PDRM) seperti mengadakan operasi-operasi semasa ke atas tempat-tempat yang dikenalpasti sebagai sarang-sarang sindiket dari masa ke semasa dan mengadakan rondaan secara berjalan kaki (*Bit and Patrol*), bermotosikal (Unit Rondaan Bermotosikal) dan berkereta (*Mobile Patrol Vehicle*) di kawasan-kawasan tumpuan ramai. Ini kerana, kehadiran anggota polis berpakaian uniform di kawasan-kawasan yang strategik secara langsung sebagai *deterrent* kepada penjenayah untuk tidak melakukan jenayah.

Usaha berterusan pihak polis telah memberikan kesan yang positif dimana statistik jenayah indeks secara keseluruhan yang melibatkan warga asing telah menunjukkan penurunan iaitu dari 13,110 kes pada tahun 2016 kepada 11,441 kes pada tahun 2017 dan 10,751 pada tahun 2018.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : PUAN VIVIAN WONG SHIR YEE [SANDAKAN]

TARIKH : 15 OKTOBER 2019

SOALAN

PUAN VIVIAN WONG SHIR YEE [SANDAKAN] minta **MENTERI DALAM NEGERI** menyatakan apakah peningkatan sumber dan aset yang sepadan untuk penstrukturan semula ESSCOM dan apakah tarikh sasaran yang ditetapkan untuk menghapuskan perintah berkurung laut yang telah dilaksanakan selama lebih daripada 5 tahun sejak dimulakan pada 19 Julai 2014.

JAWAPAN

Tuan Yang DiPertua,

Untuk makluman ahli Yang Berhormat, apabila penstrukturan semula ESSCOM dilaksanakan, ianya hanya mengubah daripada segi *Chain of Command* agensi tersebut dan tidak melibatkan penambahan sumber manusia atau aset-aset yang sedia ada. Keadaan ini adalah selari dengan polisi Kerajaan ke arah rasionalisasi Sektor Awam.

Sungguhpun begitu, permasalahan yang dihadapi oleh ESSCOM pada masa kini adalah berkaitan dengan isu penyelenggaraan dan logistik aset-aset udara dan laut yang telah mengalami kerosakan dan memerlukan kerja-kerja pembaikan serta alat ganti agar tidak merencatkan operasi yang dijalankan. Adakalanya kerosakan yang berlaku ke atas kapal/bot atau pesawat perlu dibaiki di Semenanjung dan akan mengambil masa yang agak lama.

Pada masa yang sama, proses menaik taraf sistem pengawasan radar di pulau-pulau dan kawasan perairan ESSZONE juga perlu dilaksanakan. Di samping itu, terdapat juga keperluan untuk mewujudkan penambahan kepada pos-pos dan pangkalan hadapan yang berupaya memberi bantuan logistik kepada bot-bot ronda di kawasan-kawasan *hotspot* dan strategik.

Walau bagaimanapun, cadangan penstrukturan semula ESSCOM ini masih di peringkat perbincangan oleh pihak KDN, MKN dan agensi-agensi Keselamatan di kawasan ESSZONE.

Tuan Yang DiPertua,

Setakat ini, pihak berkuasa terutamanya Polis Diraja Malaysia (PDRM) tiada menetapkan sebarang tarikh sasaran untuk menghapuskan perintah berkurung Laut yang sedang berkuatkuasa sekarang. Walau bagaimana pun, pihak Jawatankuasa Keselamatan Negeri (JKKN) dan pihak Pesuruhjaya Polis Sabah sedang merancang untuk meminda dan menambahbaik kawasan dan masa perintah berkurung terutamanya di kawasan-kawasan *hotspot* yang akan dikenakan perintah berkurung 24 jam manakala kawasan-kawasan selamat akan 'Bebas Perintah Berkurung'.

Justifikasi kawasan-kawasan *hotspot* akan mengambilkira faktor-faktor keselamatan dan keadaan yang mendorong kegiatan penculikan di kawasan ESSZONE SABAH.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 15 OKTOBER 2019 (SELASA)

SOALAN NO. 24

Minta **MENTERI PENDIDIKAN** menyatakan apakah perancangan sebenar yang ingin dilakukan oleh pihak Kementerian terhadap 21 Institut Pengajian Guru (IPG) yang dikatakan akan ditutup.

JAWAPAN

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa KPM tidak mempunyai cadangan untuk menutup Institut Pendidikan Guru (IPG). Perkara ini telah dijelaskan melalui Kenyataan Media oleh KPM yang dikeluarkan pada 10 September 2019 yang bertajuk '*21 IPG Tutup Tahun Hadapan Tak Benar*'.

Kesemua 27 IPG di seluruh negara adalah dikekalkan bagi melaksanakan fungsi latihan perguruan serta latihan pembangunan profesionalisme guru dalam perkhidmatan. Walau bagaimanapun, satu jawatankuasa khas sedang dibentuk bagi meneliti perancangan khusus dan hala tuju IPG.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 15 OKTOBER 2019 (SELASA)

SOALAN NO. 25

Minta **MENTERI PENDIDIKAN** menyatakan :-

- a. jumlah permohonan kemasukan Program Matrikulasi tahun 2019 dari setiap negeri yang berjaya dan yang ditolak; dan
- b. pendapatan isi rumah tertinggi, purata dan terendah bagi keluarga pelajar bumiputera dan bukan bumiputera yang berjaya dan yang ditolak.

JAWAPAN

Tuan Yang di-Pertua,

- a. Untuk makluman Ahli Yang Berhormat, daripada jumlah sebanyak 78,727 permohonan, seramai 55,324 orang murid lepasan Sijil Pelajaran Malaysia (SPM) telah ditawarkan untuk mengikuti Program Matrikulasi Kementerian Pendidikan bagi sesi 2019/2020. Hal ini bermakna seramai 23,403 orang murid tidak berjaya menerima tawaran bagi sesi tersebut.

Daripada jumlah keseluruhan murid lepasan SPM yang memohon, jumlah murid yang ditawarkan dan tidak ditawarkan ke Program Matrikulasi Kementerian Pendidikan bagi sesi 2019/2020 mengikut negeri adalah seperti yang berikut:

1. Johor, jumlah ditawarkan seramai 6,689. Jumlah tidak ditawarkan sebanyak 2,576;
2. Kedah, jumlah ditawarkan seramai 4,879. Jumlah tidak ditawarkan 2,121;
3. Kelantan, jumlah ditawarkan seramai 5,488. Jumlah tidak ditawarkan 1,548;
4. Melaka, jumlah ditawarkan seramai 1,901. Jumlah tidak ditawarkan 851;
5. Negeri Sembilan, jumlah ditawarkan seramai 2,529. Jumlah tidak ditawarkan 1,183;
6. Pahang, jumlah ditawarkan seramai 3,245. Jumlah tidak ditawarkan 1,089;
7. Perak, jumlah ditawarkan seramai 4,555. Jumlah tidak ditawarkan 2,362;
8. Perlis, jumlah ditawarkan seramai 469. Jumlah tidak ditawarkan 185;
9. Pulau Pinang, jumlah ditawarkan seramai 2,786. Jumlah tidak ditawarkan 1,991;
10. Selangor, jumlah ditawarkan seramai 11,254. Jumlah tidak ditawarkan 4,315;

12. Terengganu, jumlah ditawarkan seramai 3,798. Jumlah tidak ditawarkan 1,141;
13. Sabah, jumlah ditawarkan seramai 2,612. Jumlah tidak ditawarkan 1,755;
14. Sarawak, jumlah ditawarkan seramai 2,599. Jumlah tidak ditawarkan 1,153;
15. Wilayah Persekutuan Kuala Lumpur, jumlah ditawarkan seramai 2,075. Jumlah tidak ditawarkan 998;
16. Wilayah Persekutuan Labuan, jumlah ditawarkan seramai 105. Jumlah tidak ditawarkan 59; dan
17. Wilayah Persekutuan Putrajaya, jumlah ditawarkan seramai 340. Jumlah tidak ditawarkan 76.

Daripada jumlah tawaran tersebut, seramai 25,919 orang murid telah mendaftar menjadikan seramai 29,405 orang murid memilih untuk menolak tawaran bagi sesi tersebut seperti pada 30 Jun 2019.

- b. Berdasarkan data yang diisi oleh pemohon, purata pendapatan isi rumah (bersih) pelajar Program Matrikulasi Kementerian Pendidikan bagi sesi 2019/2020 adalah sebanyak RM3,916.52.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. AHMAD ZAHID BIN HAMIDI
[BAGAN DATUK]**

TARIKH : 15 OKTOBER 2019 (SELASA)

SOALAN NO. 26

Minta **MENTERI PENDIDIKAN** menyatakan berdasarkan Sistem Kajian Pengesanan Graduan pada ketika ini, berapakah jumlah graduan lepasan ijazah yang dikesan masih menganggur dan apakah langkah yang telah diambil oleh pihak Kementerian untuk menangani lambakan graduan menganggur ini.

JAWAPAN

Tuan Yang di-Pertua,

Berdasarkan Sistem Kajian Pengesanan Graduan (SKPG) Tahun 2018 Kementerian Pendidikan Malaysia (KPM), bilangan graduan yang belum bekerja selepas satu tahun tamat pengajian bagi peringkat pengajian Ijazah Pertama dan ke atas adalah seramai 30,765 orang atau 59.9 peratus daripada 51,365 orang graduan yang belum bekerja.

KPM melaksanakan saringan awal yang ketat terhadap program-program yang hendak ditawarkan oleh universiti awam (UA). Pihak UA perlu menjalankan kajian analisis yang terperinci termasuklah kajian pasaran terhadap program akademik yang hendak ditawarkan, dijumlahkan, dibekukan atau dilupuskan. Program akademik yang ditawarkan juga perlu mengambil kira keperluan guna tenaga dan bidang kritikal yang telah dikaji dan dibentangkan oleh pihak Jabatan Perkhidmatan Awam, Jabatan Perangkaan Malaysia, Institut Maklumat dan Analisis Pasaran Buruh (ILMIA), *Talentcorp*, *Jobstreet* dan agensi-agensi berkaitan yang turut hadir dalam mesyuarat saringan awal dan perakuan program.

KPM memberi penekanan kepada UA supaya menyemak semula program akademik yang dikekalkan dalam sistem penawaran adalah yang menepati aspek keperluan tenaga negara, laluan kerjaya dan tahap kebolehpasaran graduan, tiada duplikasi program akademik sedia ada dalam kalangan institusi pendidikan tinggi (IPT), implikasi kewangan, perjawatan dan fizikal serta perkembangan polisi dan dasar terkini negara. Kursus-kursus baharu seperti kursus *Internet of Things*, *Big Data* dan *Augmented Reality* diserapkan ke dalam program pengajian supaya selari dengan kehendak IR 4.0.

Bagi menyokong kepada keberkesanan kurikulum yang dibangunkan, pelbagai program kerjasama antara pihak industri dan KPM telah dilaksanakan. Antaranya melalui pengenalan *Academia Talent Exchange Programme* (AI-xChange):CEO@ *Faculty Programme* yang

telah berjaya mendapat penyertaan seramai 72 orang CEO terdiri daripada pelbagai sektor industri.

Selain itu, program peningkatan kemahiran berteraskan industri terus diperkukuhkan bagi meningkatkan kemahiran pekerja melalui pendekatan pembelajaran *Work-Based Learning* atau Pembelajaran Berasaskan Pekerjaan.

Tumpuan turut diberikan kepada pelaksanaan Program-program Intervensi Kebolehpasaran Graduan kepada pelajar-pelajar program akademik yang kurang permintaan daripada industri atau sukar mendapat pekerjaan. Melalui program intervensi ini pelajar-pelajar ini akan diberikan nilai tambah melalui pensijilan tambahan seperti *digital marketing*, *cyber security* dan lain-lain bagi membantu meningkatkan kadar kebolehpasaran graduan.

KPM juga meningkatkan penerapan atribut keusahawanan kepada pelajar untuk menggalakkan graduan bekerja sendiri dan mampu berdaya tahan dalam jangka masa panjang. Melalui Kerangka Penjana Pekerjaan (*Job Creator Framework*) pelajar akan didedahkan dengan program-program Pembudayaan, Pengukuhan dan Sokongan untuk menjadi seorang usahawan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : TUAN RAMKARPAL SINGH A/L KARPAL SINGH
[BUKIT GELUGOR]**

TARIKH : 15 OKTOBER 2019

SOALAN

TUAN RAMKARPAL SINGH A/L KARPAL SINGH [BUKIT GELUGOR]
minta **MENTERI DALAM NEGERI** menyatakan sama ada terdapat unsur-
unsur salah guna kuasa dalam kes penembakan mati 3 orang oleh polis di
Rawang baru-baru ini dan sekiranya ya, apakah tindakan Kerajaan untuk
menangani isu salah guna kuasa sebegini yang bukan lagi perkara baru.

JAWAPAN

Tuan Yang Dipertua,

Untuk makluman Ahli Yang Berhormat Bukit Gelugor serta Dewan Yang Mulia, berhubung kes penembakan mati tiga (3) individu lelaki di Rawang baru-baru ini, berdasarkan laporan dari PDRM, kejadian tersebut bermula apabila kejar mengejar antara pihak polis dengan sebuah kereta yang mencurigakan setelah pemandu kereta tersebut enggan berhenti untuk pemeriksaan polis di Jalan Kawasan Perindustrian Rawang pada pagi 14 September 2019.

Berdasarkan laporan lagi, individu dalam kereta tersebut telah melepaskan tembakan ke arah polis semasa dikejar dan sekali lagi melepaskan tembakan setelah kereta yang dinaiki terbabas di Jalan Batu Arang, Rawang. Pihak polis telah melepaskan beberapa das tembakan ke arah individu-individu tersebut bagi mempertahankan diri sehingga keadaan menjadi selamat yang berakhir dengan ketiga-tiga individu tersebut mati dalam insiden tembak-menembak tersebut.

Tuan Yang Dipertua,

Untuk makluman Ahli Yang Berhormat Bukit Gelugor serta Dewan Yang Mulia ini, tindakan yang diambil pihak polis adalah selaras dengan hak mempertahankan diri di bawah seksyen 100 dan 103 Kanun Keseksaan serta berlandaskan kepada prinsip undang-undang sedia ada, peraturan dan *standard operating procedure* (SOP) polis yang telah ditetapkan. Polis DiRaja Malaysia (PDRM) sentiasa mengingatkan semua anggotanya agar mengambil langkah-langkah keselamatan diri dan juga had kuasa semasa menggunakan senjata api berdasarkan Perintah Tetap Ketua Polis Negara (IGSO) D222 dan juga Arahan Ketua Polis Negara (*IG's Order*) No 79.

Walau bagaimanapun, setiap kejadian berbalas tembakan atau melepaskan tembakan oleh anggota polis akan disiasat dengan rapi dan jika terdapat kecuaiian atau salah laku anggota polis semasa melaksanakan tugas tersebut, tindakan disiplin atau pendakwaan di Mahkamah akan diambil terhadap anggota tersebut.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATUK SRI RICHARD RIOT ANAK JAEM
(SERIAN)**

TARIKH : 15 OKTOBER 2019

SOALAN

DATO' SRI RICHARD RIOT ANAK JAEM [SERIAN] minta **MENTERI DALAM NEGERI** menyatakan apakah rancangan Kerajaan untuk menaik taraf Kompleks Imigresen, Kastam, Kuarantin dan Keselamatan (ICQS) Tebedu, Sarawak.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri sedang dalam perancangan untuk menaiktaraf Kompleks Imigresen, Kastam, Kuarantin dan Keselamatan (ICQS) Tebedu. Keperluan projek ini adalah bagi memastikan kemudahan keluar masuk penumpang dan barangan melalui pintu masuk ini disediakan dengan komprehensif bagi menyokong pembukaan semula aktiviti perdagangan di Tebedu susulan daripada *Border Trade Agreement* (BTA) dan *Border Crossing Agreement* (CSA) yang akan ditandatangani oleh kedua-dua Kerajaan Malaysia dan Indonesia.

Walau bagaimanapun, keengganan Kerajaan Indonesia untukewartakan Entikong sebagai *Legal Landing Port* telah mengakibatkan penangguhan proses penandatangani Perjanjian tersebut. Sehubungan itu, proses penaiktarafan Kompleks ICQS Tebedu hanya akan dilaksanakan menggunakan peruntukan sedia ada yang telah diluluskan di dalam Rancangan Malaysia Ke-11 *Rolling Plan* 3 (RMK11 RP3).

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HAJI ABD. LATIFF BIN AHMAD
(MERSING)**

TARIKH : 15 OKTOBER 2019 (SELASA)

SOALAN

Minta **MENTERI PERTAHANAN** menyatakan apakah strategi yang diambil oleh Kementerian dalam Kempen Tabung Pahlawan 2019 untuk memberi kesedaran kepada masyarakat untuk menyumbang kepada tabung berkenaan. Berapakah kutipan yang diperolehi setiap tahun bagi lima tahun terdahulu dan adakah mencapai sasaran yang ditetapkan.

JAWAPAN

Tuan Yang di-Pertua,

Pelaksanaan Kempen Tabung Pahlawan (KTP) bagi tahun 2019 diterajui oleh Jabatan Hal Ehwal Veteran ATM (JHEV ATM) dengan kolaborasi bersama Persatuan Veteran Angkatan Tentera Malaysia (PVATM) dan dibantu oleh persatuan-persatuan veteran yang lain. Tema KTP 2019 adalah 'Penghormatan Di Atas Pengorbanan' dengan objektif seperti berikut:

1. Penghargaan atas perjuangan serta pengorbanan para Pahlawan Negara (veteran ATM) dalam mempertahankan dan mengekalkan kedaulatan, keselamatan dan keamanan negara;
2. Menyemai dan meningkatkan semangat patriotisme dan sifat kecintaan terhadap negara dalam setiap warganegara Malaysia khususnya pada generasi muda; dan

3. Mengumpul dana tabung kebajikan sumbangan daripada kerajaan, syarikat *Government-Linked Company* (GLC), syarikat swasta dan rakyat Malaysia bagi menampung aktiviti kebajikan veteran ATM.

Tiga strategi utama akan digunakan bagi memastikan kempen ini mencapai objektif yang telah ditetapkan iaitu:

1. Kutipan secara *online* bagi memudahkan orang ramai membuat sumbangan tunai menggunakan platform perbankan internet selain kemudahan secara *offline* seperti deposit tunai/cek/kaunter bank;
2. Kutipan Jalanan oleh ahli persatuan-persatuan veteran ATM bagi meningkatkan kesedaran kepada orang ramai di atas pengorbanan dan jasa bakti para pahlawan tanah air yang menjaga keselamatan dan kedaulatan negara selama ini selain dapat mendekatkan veteran ATM dengan masyarakat bagi memupuk semangat patriotik dan cintakan negara terutama di kalangan remaja dan belia-belia supaya menghayati perjuangan dan pengorbanan veteran ATM; dan
3. Sumbangan badan korporat yang mana tidak seperti tahun-tahun sebelumnya, di mana hanya tertumpu kepada syarikat yang berurusan dengan Kementerian Pertahanan sahaja tetapi dipanjangkan kepada syarikat berkaitan kerajaan, badan korporat serta syarikat swasta di seluruh negara yang mengecapi dan menikmati keamanan hasil pengorbanan Pahlawan Negara.

Tanpa pengorbanan dan jasa-jasa para veteran ATM yang telah mempertahankan kedaulatan dan keamanan negara tidak mungkin akan wujud keselamatan dan ketenteraman yang membolehkan urusan-urusan perniagaan dan aktiviti ekonomi dapat dijalankan dengan lancar. Dana yang terkumpul ini akan disalurkan ke dalam akaun Tabung Rayuan Hari Pahlawan di bawah seliaan Yayasan Veteran ATM dan digunakan untuk memberi bantuan kepada veteran ATM dan keluarga mereka yang memerlukan bantuan seperti bantuan sara hidup bagi mereka yang tidak berkemampuan dan tercedera, keperluan perubatan dan peralatan, bantuan pendidikan sekolah dan pengajian tinggi dan bantuan-bantuan lain yang berunsur kebajikan.

Antara program-program yang dirancang sepanjang penganjuran dan pelaksanaan KTP 2019 adalah seperti berikut:

1. Program Menyantuni Gelandangan;
2. Program Derma Darah;
3. Majlis Pelancaran KTP 2019;
4. Makan Malam Amal KTP 2019;
5. Larian Veteran ATM 19.33KM; dan
6. Majlis Penghargaan KTP 2019.

Usaha Kementerian Pertahanan ini, mendapat sokongan dan kerjasama Kementerian Komunikasi dan Multimedia Malaysia (KKMM) bagi pelaksanaan strategi komunikasi atau promosi KTP 2019 dengan menggunakan saluran komunikasi media arus perdana dan media sosial yang memfokuskan kesedaran orang awam dan rayuan untuk menyumbang.

Penganjuran KTP bagi tahun 2013 hingga 2018 diterajui oleh Persatuan Veteran Angkatan Tentera Malaysia (PVATM). Jumlah kutipan yang diperolehi pada tahun 2014 adalah sebanyak RM3.5 juta, tahun 2015 sebanyak RM2.93 juta, tahun 2016 sebanyak RM4.36 juta, tahun 2017 sebanyak RM7.17 juta (RM5.0 juta sumbangan daripada kerajaan) dan kutipan pada tahun 2018 adalah sebanyak RM4.18 juta. Sasaran kutipan KTP 2019 adalah sekurang-kurangnya sebanyak RM 6 juta. Jumlah kutipan sehingga kini adalah sebanyak **RM3,100,739.15**.

Saya menyeru kepada semua ahli-ahli dewan ini untuk menyumbang dalam apa bentuk sekalipun di dalam KTP 2019. Setiap sumbangan kepada KTP adalah layak menikmati penolakan cukai di bawah subseksyen 44(6) Akta Cukai Pendapatan 1967, Lembaga Hasil Dalam Negeri (LHDN).

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : DATO' SRI HAJAH NANCY SHUKRI
[BATANG SADONG]
TARIKH : 15 OKTOBER 2019 (SELASA)

SOALAN NO. 30

Minta **MENTERI PENDIDIKAN** menyatakan status terkini pembinaan SK Abang Man di Simunjan.

JAWAPAN

Tuan Yang di-Pertua,

Untuk makluman Ahli Yang Berhormat, projek pembinaan SK Abang Man, Simunjan telah diluluskan untuk pelaksanaan di bawah RMK-11. Skop projek ini meliputi pembinaan gantian penuh 24 bilik darjah, asrama untuk 80 orang pelajar termasuk enam (6) unit rumah guru dan kemudahan-kemudahan lain di sekolah tersebut. Pelaksanaan projek adalah di bawah tanggungjawab dan seliaan pihak Jabatan Kerja Raya (JKR). Sehingga kini, projek telah selesai proses *value engineering* (VE) pada Februari 2019. Projek ini dijangka akan diiklankan pada 26 Oktober 2019. Perolehan projek ini akan dilaksanakan sepenuhnya oleh JKR.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATUK SERI PANGLIMA WILFRED
MADIUS TANGAU (TUARAN)**

TARIKH : 15 OKTOBER 2019

SOALAN

DATUK SERI PANGLIMA WILFRED MADIUS TANGAU (TUARAN)
minta **MENTERI DALAM NEGERI** menyatakan bilakah Kerajaan akan melaksanakan semua cadangan RCI mengenai Pendatang Tanpa Izin di Sabah.

JAWAPAN

Tuan Yang Di Pertua,

Seperti mana Ahli Yang Berhormat sedia maklum, menyusuli pengumuman hasil dapatan dan juga rekomendasi Suruhanjaya Siasatan Diraja (RCI) Mengenai Pendatang Asing di Sabah, Kerajaan telah mengambil inisiatif menubuhkan Jawatankuasa Pengurusan Warga Asing di Sabah (JKPWAS) yang terbahagi kepada dua tier iaitu Jawatankuasa Induk Pengurusan Warga Asing di Sabah (JKPWAS-Induk) dan Jawatankuasa Teknikal Pengurusan Warga Asing di Sabah (JKPWAS-Teknikal). Kedua-dua Jawatankuasa dianggotai oleh Jabatan / Agensi / Bahagian Persekutuan dan Negeri yang terlibat dengan pengurusan warga asing di Sabah yang antara lainnya adalah Jabatan Ketua Menteri Sabah, Jabatan Pendaftaran Negara (JPN), Jabatan Imigresen Malaysia (JIM), Polis Diraja Malaysia (PDRM), Majlis Keselamatan Negara (MKN) serta beberapa Jabatan/Agensi yang lain.

Jawatankuasa ini juga sentiasa mengambil langkah proaktif dalam mengatasi isu-isu berbangkit dalam melaksanakan pelan tindakan yang dirumuskan oleh Suruhanjaya melalui mesyuarat yang dijadualkan secara berkala sepanjang tahun. Kerajaan melalui JKPWAS turut fokus dalam menangani isu keberadaan Pendatang Asing Tanpa Izin (PATI) di Sabah dengan pelaksanaan usaha-usaha seperti mana berikut:-

- a. Menggiatkan tindakan penguatkuasaan serta pengusiran ke atas pendatang asing tanpa izin (PATI) di Sabah. Kesungguhan JKPWAS untuk mengatasi isu PATI ini dapat dilihat melalui jumlah pengusiran yang dilaksanakan bermula dari tahun 1990 sehingga 30 September 2019 yang berjumlah seramai 586,700 orang;
- b. Kedua, kerjasama dengan Kedutaan Filipina bagi memastikan pihaknya mempercepatkan pengeluaran dokumen perjalanan (*Travel Documents-TD*) kepada tahanan yang hendak diusir ke negara asal. Kerjasama ini menghasilkan impak positif dan dokumen tersebut dapat dikeluarkan dalam tempoh dua (2) hingga tiga (3) minggu berbanding tempoh dua (2) hingga tiga (3) bulan sebelum ini semenjak pelaksanaannya pada Januari 2016;

- c. Ketiga, JKPWAS melalui Jawatankuasa Kecil Sosial dan Komunikasi Induk juga memainkan peranan dalam menyelaraskan program kesedaran dan melaksanakan hebahan program serta aktiviti yang dijalankan oleh Jabatan/Agensi antara lain adalah seperti ESSCOM, MKN dan Jabatan Penerangan Negeri Sabah berhubung isu-isu berkaitan pendatang asing tanpa izin (PATI) di Sabah dan memberi penerangan kepada masyarakat bahawa usaha-usaha penguatkuasaan terhadap PATI sentiasa diutamakan;
- d. Keempat, pihak Kerajaan telah memperkenalkan penggunaan terma 'Rekod Kelahiran' bagi dokumen pendaftaran kelahiran Bukan Warganegara di Sabah yang telah berkuat kuasa pada 15 September 2015 yang bertujuan untuk membezakan dengan jelas dokumen pendaftaran kelahiran bagi Warganegara dan Bukan Warganegara di Sabah. Oleh itu, terma 'Sijil Kelahiran' pada dokumen pendaftaran negeri Sabah hanya akan dikhususkan kepada Warganegara sahaja; dan
- e. Kelima, Kerajaan memandang serius berhubung kepelbagaian dokumen dan pas yang dikeluarkan oleh Kerajaan Persekutuan dan Kerajaan Negeri kepada warga asing di negeri Sabah. Kepelbagaian dokumen dan pas ini menyukarkan penguatkuasaan dan pengawalan oleh agensi penguatkuasaan terutamanya dari aspek rekod keberadaan dan pergerakan warga asing di negeri Sabah. Justeru, untuk meningkatkan penguatkuasaan dan memastikan rekod warga asing ini berpusat dan seragam, Kerajaan melalui JKPWAS memutuskan pengeluaran Pas Sementara Sabah oleh JIM Negeri Sabah yang akan dilaksanakan pada pertengahan tahun hadapan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 15.10.2019 (SELASA)

SOALAN

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan senarai syarikat-syarikat yang membekal
barang-barang keperluan di kawasan Parlimen P216 Hulu Rajang.

JAWAPAN

Tuan Yang Di-Pertua,

Kementerian telah melantik Syarikat-Syarikat *transporter* untuk membeli dan menghantar bekalan barang-barang keperluan sehingga ke *point of sales* (POS) di kawasan pedalaman Sarawak. Pada tahun ini, sebanyak **16 buah Syarikat** telah dilantik untuk menghantar barangan keperluan ke **88 kawasan pengedaran** yang berada di **P.216 Hulu Rajang** syarikat-syarikat tersebut adalah:

1. Mazmur Teknikal Sdn Bhd
2. Mujong Shipping Enterprise
3. Pila Jaya Enterprise
4. Sri Cahaya Enterprise
5. Syarikat Beta Emas
6. Syarikat Galaksi Bintang
7. Syarikat Perniagaan Damai Sejati
8. Syarikat Uniport Servis
9. 1 Malaysia Edar Trading
10. E.C Enterprise
11. Kapit Transport Trading
12. Keris Adika Enterprise
13. Koperasi Titian Bersama Kapit Berhad
14. Syarikat Gunung Mas Kapit
15. Syarikat Sinar Jaya
16. Trixie And Company

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 15 OKTOBER 2019 (SELASA)

SOALAN NO. 33

Dato' Ngeh Koo Ham [Beruas] minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan daripada siasatan Kerajaan Indonesia, siapakah yang sebenarnya telah menyebabkan kebakaran besar-besaran di Indonesia pada bulan September 2019 yang menyebabkan jerebu tebal menyelubungi Semenanjung Malaysia, Sabah dan Sarawak.

JAWAPAN

Tuan Yang Dipertua,

Untuk makluman Ahli Yang Berhormat, buat masa ini, pihak Kementerian tidak mempunyai maklumat mengenai syarikat yang telah dikenalpasti terlibat dan menyumbang kepada krisis jerebu pada tahun ini. Walau bagaimanapun, Malaysia berpendirian bahawa pihak Indonesia berhak untuk mengambil tindakan undang-undang ke atas mana-mana syarikat atau individu yang melakukan pembakaran terbuka di negara tersebut berlandaskan peruntukan undang-undang domestik yang dikuatkuasakan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. ADHAM BIN BABA
[TENGARA]**

TARIKH : 15 OKTOBER 2019 (SELASA)

SOALAN NO. 34

Minta **MENTERI PENDIDIKAN** menyatakan mengikut daftar Agensi Kelayakan Malaysia (MQA), berapa jumlah bidang dan kursus yang ditawarkan setakat ini di seluruh Institusi Pengajian Tinggi serta bidang atau kursus apakah yang telah digantikan dengan bidang yang menepati dan memenuhi keperluan kehendak industri terkini.

JAWAPAN

Tuan Yang di-Pertua,

Untuk makluman Ahli Yang Berhormat, Seksyen 81 Akta Agensi Kelayakan Malaysia 2007 (Akta 679) memperuntukkan Agensi Kelayakan Malaysia (Malaysian Qualifications Agency, MQA) mengadakan dan menyenggarakan satu daftar kebangsaan iaitu Daftar Kelayakan Malaysia atau *Malaysian Qualifications Register* (MQR) yang mengandungi kelayakan yang dianugerahkan oleh Pemberi Pendidikan Tinggi (PPT) dan diakredit di bawah Akta tersebut. MQR merupakan sumber rujukan dan panduan berkaitan program pendidikan tinggi yang telah diakreditkan dan dianugerahkan oleh PPT sama ada dari dalam atau luar negara.

Pihak MQA mengkategorikan bidang pengajian sesuatu program berdasarkan *National Education Code* (NEC). NEC merupakan manual yang dibangunkan oleh Kementerian Pendidikan Malaysia sebagai sumber rujukan untuk mengklasifikasikan bidang pendidikan dan latihan di Malaysia.

Sehingga 27 September 2019, terdapat sebanyak 14,123 program atau kelayakan disenaraikan dalam MQR yang merangkumi 25 bidang spesifik (*narrow field*). Lima (5) bidang spesifik dengan bilangan tertinggi penawaran program adalah seperti berikut:

1. *NEC 340 - Business and Administration* : 3,025 program.
2. *NEC 520 - Engineering and Engineering Trade* : 2,624 program.
3. *NEC 480 - Computer* : 1,419 program.
4. *NEC 720 - Health (Broad Programme)* : 1,104 program.
5. *NEC 140 - Teacher Training & Education Science (Broad Programme)*: 1,078 program.

Manakala jumlah program untuk 20 bidang yang lain adalah sebanyak 4,873 program.

Pihak Pemberi Pendidikan Tinggi (PPT) melaksanakan pelbagai penambahbaikan dan pengemaskinian program berdasarkan keperluan semasa dan bidang program yang ditambah baik tersebut masih kekal dalam kategori NEC yang sama. MQA juga telah memperkenalkan Kerangka Penawaran Program Hibrid dalam usaha menyokong elemen *transdisciplinary* dalam *Higher Education 4.0*. PPT boleh mereka bentuk program pengajian yang dinamik dan mampu menarik minat industri dalam konteks kebolehpasaran graduan. Di bawah Kerangka ini PPT boleh menawarkan program pengajian yang menggabungkan dua atau tiga bidang tanpa sebarang komponen dominan oleh mana-mana bidang sekurang-kurangnya 50 peratus.

Dari segi akreditasi, MQA menjalankan penilaian Akreditasi berdasarkan Kod Amalan Akreditasi Program (*Code of Practice for Programme Accreditation, COPPA*). COPPA menekankan agar:

1. Penawaran program pengajian perlu dibuat berdasarkan analisis keperluan (*need assessment*) dan kajian pasaran.
2. Pembentukan silibus program perlu mendapat input daripada pakar akademik dan industri termasuk pemakaian Standard Program sekiranya berkaitan.
3. Kurikulum sentiasa dipantau melalui Audit Pematuhan (sekurang-kurangnya sekali dalam tempoh 5 tahun) yang melibatkan pakar-pakar daripada akademik dan industri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN CHAN MING KAI (ALOR SETAR)

TARIKH : 15 OKTOBER 2019

SOALAN

TUAN CHAN MING KAI [ALOR SETAR] minta **MENTERI DALAM NEGERI** menyatakan :-

(a) mengapa PDRM mengeluarkan saman kepada pengguna kenderaan bukan komersil yang membawa barangan bukan untuk komersil dengan anggapan itu barangan berunsur perniagaan; dan

(b) apakah garis panduan bagi budi bicara PDRM semasa membuat anggapan sesuatu barangan yang dibawa tersebut harus dikategorikan sebagai berunsur perniagaan dan bukan kegunaan peribadi.

JAWAPAN

Tuan Yang Di Pertua,

Untuk makluman Ahli Yang Berhormat Alor Setar serta Dewan Yang Mulia ini, menggunakan sesuatu lesen kenderaan motor untuk tujuan selain dari yang dinyatakan oleh lesen tersebut adalah satu kesalahan di bawah seksyen 23 Akta Pengangkutan Jalan 1987. Pihak polis berhak untuk mengeluarkan saman untuk kesalahan ini seperti yang dinyatakan dalam seksyen 53 Akta yang sama. Dalam perkara ini, adalah menjadi satu kesalahan sekiranya lesen kenderaan motor persendirian digunakan untuk membawa barangan dagangan.

Polis Diraja Malaysia (PDRM) tidak akan mengeluarkan saman ke atas kenderaan persendirian sekiranya membawa barangan untuk kegunaan persendirian. Saman yang dikeluarkan ke atas kenderaan persendirian yang membawa barangan yang dianggap untuk komersil adalah setelah mengambil kira perkara-perkara berikut:

- i. Kuantiti dan jenis barangan yang tidak munasabah untuk kegunaan persendirian berdasarkan invois yang dikemukakan;
- ii. Pemilik kenderaan persendirian mempunyai lesen perniagaan yang didaftarkan atau mempunyai premis perniagaan; dan
- iii. Pemilik kenderaan persendirian mempunyai syarikat yang didaftarkan di Suruhanjaya Syarikat Malaysia (SSM) dan jenis perniagaan yang didaftarkan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATUK SYED ABU HUSSIN B. HAFIZ SYED
ABDUL FASAL (BUKIT GANTANG)**

TARIKH : 15 OKTOBER 2019

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI DALAM NEGERI** menyatakan apakah tindakan yang telah diambil kepada pihak atau mereka yang mengeluarkan kata-kata yang menghina Ke Bawah Duli Yang Maha Mulia Seri Paduka Baginda Yang di-Pertuan Agong Malaysia, unit beruniform dan anggota keselamatan serta kebiadapan menghina agama dan kaum di Malaysia. Sejak muktahir ini hubungan antara kaum di Malaysia berada pada tahap yang membimbangkan.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri tidak akan berkompromi dan akan mengambil tindakan tegas ke atas mana-mana pihak yang mengeluarkan kata-kata yang menghina Ke Bawah Duli Yang Maha Mulia Seri Paduka Baginda Yang di-Pertuan Agong Malaysia, unit beruniform dan anggota keselamatan serta kebiadapan menghina agama dan kaum di Malaysia. Tindakan tersebut boleh diambil oleh pihak berkuasa berdasarkan peruntukan undang-undang sedia ada seperti Akta Hasutan 1948, Kanun Keseksaan dan Akta Komunikasi Dan Multimedia 1998 bagi memastikan keharmonian antara kaum di Malaysia terus terjaga.

Sejak bulan Mei 2018, sebanyak 4 kes yang melibatkan penghinaan Institusi Diraja telah dituduh di Mahkamah di mana seorang telah mengaku bersalah dan dijatuhi hukuman penjara selama setahun. Dua (2) kes adalah melibatkan kesalahan di bawah Seksyen 4(1) Akta Hasutan 1948 dan Seksyen 233 Akta Komunikasi & Multimedia 1998 iaitu penggunaan tidak wajar kemudahan rangkaian atau perkhidmatan rangkaian. Manakala 2 kes lagi adalah melibatkan kesalahan di bawah Seksyen 4(1) Akta Hasutan 1948.

Bagi kes yang menyentuh isu perkauman, 2 kes telah dituduh di Mahkamah dan masih di dalam perbicaraan. Bagi kes pertama telah disiasat di bawah Seksyen 504 Kanun Keseksaan iaitu dengan sengaja mengaibkan dengan niat hendak membangkitkan pecah keamanan dan Seksyen 233 Akta Komunikasi dan Multimedia 1998 iaitu penggunaan tidak wajar kemudahan rangkaian atau perkhidmatan rangkaian. Manakala bagi kes yang kedua, siasatan telah dilakukan di bawah Seksyen 4(1) Akta Hasutan 1948.

Selain itu, sebanyak satu kertas siasatan telah dibuka bagi kes penghinaan unit beruniform dan anggota keselamatan. Kertas siasatan berkenaan telah dirujuk kepada Timbalan Pendakwa Raya dan dikategorikan sebagai Tiada Tindakan Lanjut (NFA) pada 10 September 2019.

Pemantauan secara berterusan dilakukan oleh pihak PDRM dengan lebih berhati-hati dan berhemah bagi memastikan sebarang tindakan yang diambil tidak menimbulkan ketegangan di antara kaum dan agama. Perkara ini juga adalah bagi memastikan isu-isu yang dibangkitkan dapat ditangani secara lebih berkesan dengan mengambil kira kepentingan keselamatan dan ketenteraman awam secara keseluruhan berlandaskan undang-undang yang berkuatkuasa.